



**I  
N  
S  
A  
I  
T**

**ABG bai stretim  
K1.2milion dinau  
nau - P3**

**Ilektorol Komisin  
lonsim Famili oda  
Listing - P14 na 15**

**Jiwaka i gat bilip  
long humen risos  
- P16**

# Em i asua o nogat? ...bai save tude

**PRAIM Minista Se Michael So-  
mare bai save tude sapos em i  
gat asua o nogat.**

Sapos i gat dispela i min em i no inap long stap lidaman na moa yet stap praim minista.

Sapos kain disisen i kamap, dispela bai i namba wan taim long histori bilong kantri long wanpela praim minista i pinis long wok bilong em bihainim askim bilong lidasip traibunel.

Moa yet dispela bai sori taim tu long kantri long lukim man ol manmeri i kolim "Sif" long pinis olsem lidaman long kain rot olsem.

Se Michael i go pas long lukim dispela kantri i kisim self gavman long 1974 na bihain i go pas long lukim kantri i kisim independens long 1975.

Se Michael i gat bikpela nem long kantri na long ausait wantaim.

Tokaut bilong asua em i gat na kain mekimsave em bai kisim bai kamap long narapela wik Tunde.

Taim dispela i kamap em bai bikpela tok long kantri na long ol arapela kantri wantaim.

Dispela em sapos ol toktok na Kot bilong las wik i kam inap nau i no go long sait bilong Se Michael.

Long Mande dispela wik Se Michael i abrusim askim Pablik Prosekyuta Pondros Kaluwin i mekim long Se Michael i mas sanap



**SE MICHAEL:** Nogat planti toktok.

long sait tasol dispela i no kamap.

Dispela i kamap taim tripela-man Traibunel we i gat Roger Gyles, Se Bruce Robertson na Se Robin Auld i tok em i no ken sanap long sait.

Gyles na Se Bruce i tok nogat long wanem i nogat gutpela as tasol Se Robin i tok em i mas sanap long sait.

Se Robin i tok em i bihainim loa

bilong disisen i mas kamap bihainim tingting bilong planti lain, na olsem em tok Se Michael i no ken pinis.

Tasol long Tunde dispela wik em i tok dispela disisen bilong askim Se Michael long sanap long sait i no wok bilong ol.

Em i tok dispela i wok bilong Sif Jastis Se Salamo Injia na em i no

stret long Se Salamo i givim wok long ol.

Moa yet i nogat wanpela hap tok i stap long loa bilong kantri long ol i mas mekim kain disisen.

Em i tok taim wanpela i bihainim lo, lidaman i mas sanap long sait long namba wan taim stret taim traibunel i kamap.

Em i givim tok piksa long pasin Memba bilong Aitape Lumi, Patrick Pruaitch i mekim taim lidasip traibunel i kamap long mekim wok painim long em.

Long dispela as em i tok Se Salamo Injia i mas bihainim dispela lo na askim Se Michael long sanap long sait bipo long ol i kamap na harim tok.

Lidasip Traibunel i kamap bihainim askim bilong Ombudsmen Komisen husat i tok Se Michael i brukim loa na i asua long wanem em i no givim ripot bilong pablik mani long rot em i yusim long las 10-pela yia (1993 i kam long 2003).

Aninit long Lidasip Kod long Duti na Responsibiliti bilong Lidaman Se Michael i mas givim ripot bilong mani long Komisen long wanwan yia.

Se Michael i no mekim olsem na Komisen i tok dispela em i asua na olsem lidasip traibunel i mas kamap na mekim wok painim long em.

**FRI  
bihain  
long  
2pela  
SMS**

Salim  
tupela sms.  
kisim 18  
Fri sms

**Kisim 20 teks  
long prais lo tupela  
teks tasol!**

Sapos yu salim  
tupela teks namel  
long 7am monin  
na 9:59pm nait bai  
yu kisim 18 teks fri  
behain long em.

**Digicel**  
Bikpela, Stropela moa Network bilong PNG.

Digicel Terns na Kondisen bai stap.

**GLOBE  
SITA CORNED  
MEAT LOAF**

*More Easy  
More Tasty  
More Energy*

**GLOBE**....the perfect choice

**PNG  
MADE**



# BCL mekim K2.8 milion win mani

BOGENVIL Kopa Limited, (BCL) kampani i laik developim Panguna main gen long Bogenvil i kamap olsem K2.8 milion win mani long 2010.

Dispela i daunbilong mak kampani i mekim long 2009 we em kamapim olsem K8.7 milion win mani.

Tasol maski long dispela i lusim tu olsem K5.9 milion namel long dispela yia. Na dispela, em i save bikos em i no moa mekim wok, menesing dairekta bilong kampani, Peter Taylor i tok long taim em i tokaut long ripot bilong kampani long las wik.

Wantaim dispela Taylor i tok kampani i stap na long kot na i wok long lusim mani long baim kot tu.

Em i tok em i gutpela nius long ol sea holda tu long gavman i laik opim gen main.

Em i tok kampani i hop long kamapim gutpela win mani long 2011.

Kampani i gat inap mani long kisim ol wok manmeri sapos main i op gen.

Na maski em i no wok em i baim yet takis long Intenel Revenu Komisen (IRC) long gavman i luksave long em i stap yet.

Long save gut Bogenvil Kopa Limited i nogat wanpela samting i stap long graun we bai soim olsem velu o strong bilong em i go daun.

Bikos long dispela kampani i kisim toktok long bikpela loya na ol akaun-

ten long tokim em stret sapos kain tingting em i gat i stret na i tru.

Kampani i baim olsem K13 milion i go long IRC long 2007 bihain long IRC i givim em toksave long ol takis em i no baim na dispela toksave i kamap olsem Garnishee toksave long benk akaun bilong em.

Moa long K48.8 milion em kampani i baim long Suprim Kot long makim IRC long 2010 aninit long tem kot-sanksen.

Na dispela mani em ol kot i holim inap long taim sapos olgeta samting i stret na kot i painim BCL i nogat asua bai givim bek mani i go. Na dispela bai go wantaim win mani.



SILIP ISI: Panguna main long Bougainville.



NATIONAL FISHERIES AUTHORITY

## Tuna Tegang Projek – Midia Rilis

**P**NG Nesanel Fiseris Atoriti insait long Fiseris Menesmen Yunit bilong en na wok-bung em i gat wantaim Sekretariat bilong Pasifik Komyuniti i wok long karimaut wok bilong tuna teging (putim namba wantaim kapa-mak long ol tuna fis) insait long Papua Niugini na Westen na Sentral Pasifik Osen (WCPO) stat long 2006. PNG em bikpela eria na teging bai kamap insait long neks tripela yia i kam.

### As tingting bilong dispela Projek em:

- Long kisim rekot we bai givim bikpela helpim long go wantaim, na daunim planti tingting, em WCPO i gat na helpim PNG long glasim wanem kain ol tuna stok i stap;
- Long kisim infomesin long reit o mak bilong muvmen na wanem ol miks tuna i stap wantaim ol narapela fis agregeting divais (FADs) namel long ikweitorial na arapela rijon bilong Pasifik besin na insait long PNG.
- Long kisim infomesin long lokal reit bilong kisim ol fis na hamas tuna i save kamap long ol eria insait long PNG solwara.
- Long kisim infomesin long wanem ol lokal tuna i stap na ol narapela we i muv i go insait.

Ol rekot bilong pastaim em nau bai i go bung wantaim rijinal stok asesmen bilong nau. Bihaun long PNG i bin stap insait long ol narapela tuna teging progrem, PNG i soim olsem em i gat strong long karimaut stadi em yet insait long solwara bilong em. Wanem ol wok long mekim o karimaut we bai lukim projek i pinis gut long bihain bai karamapim ol samting olsem; konvensional tuna teging, akival teging, teg rikavari, tag siding na data analisis (sekim gut ol rekot).

Wanpela bot we i bin stap long projek pastaim, em wanpela Okinawa statil pol-na-lain fising bot,

Soltai 105 em bai stap insait long dispela tuna teging projek long PNG. Ol Teg Rikavari Ofisa em ol i makim pinis na ol bai stap long ol bikpela tuna lending ples insait long kantri na tu ol ofisa husat bai stap antap long bot insait long dispela 3 mun teging operesin, Pol-na-lain rot bilong kisim fis i save yusim ol laip beit na ol beiting graun em ol i luksave pinis long beit fising we bai kamap insait long taim bilong dispela projek. Planti long ol dispela beiting graun em ol i yusim long ol projek long pastaim.

Long helpim wok bilong tuna teging projek long go het gut, mipela i askim ol jeneral pablik, fising indastri na ol gem fising klab insait long ol marin provins husat i painim wanpela fis i gat teg o kapa-mak long en i mas mekim rekot, kisim teg namba, deit ol i kisim fis, eria we ol i painim fis ya, wanem kain tuna ol i kisim, longpela bilong en o weit bilong en na bringim bek dispela infomesin wantaim teg i go long NFA ofis. Givim ol teg i go long ol teg rikavari ofisa o Provinsal Fiseris ofisa long wanem hap yu painim long en. Bai yu kisim riwot o prais taim yu bringim teg i go.

Long kisim moa infomesin, plis ringim Ludwig Kumoru; Ekting Eksekutiv Menesa, Fiseris Menesmen Yunit long (Telefon: 3090444, Fax: 3202061, Email: [lkumoru@fisheries.gov.pg](mailto:lkumoru@fisheries.gov.pg))



**Sylvester Pokajam**  
Menesing Dairekta  
Nesanel Fiseris Atoriti



**Asbisop Brian Barnes, OFM, D.D.**

MI LAIK stori tude long wanpela Fransiskan brata bilong mi.

Las wik Fraide, sampela lain i bung wantaim long Jackson's ples balus long tok gutbai long Asbisop Brian Barnes. Yumi save, bipo Brian i bin stap Asbisop bilong Pot Mosbi, na taim em i winim 75 krismas em i bin ritaia o go malalo. Asbisop Brian i go long Sidni (Sydney), Australia, long lukim dokta. Brian i no go pinis; em i sitisen o man bilong PNG stret. Em i go bikos nau em i lapun pinis na em i nidim spesel helpim bilong ol lapun. Tingting na het bilong em i smat na klia olgeta, olsem bipo, tasol bodi i stat long bagarap. Yu save long tok bilong Buk Baibel - laip bilong man bilong graun i 70 yia o 80 krismas bilong man i gat strong. Brian i lusim pinis 75 krismas, na i wok long kamap klostu long 80 krismas. Tingting bilong em i gutpela, tasol bodi i karim hevi bilong ol lapun nau. Sor! Yumi olgeta i man bilong graun tasol!

Hia long PNG i nogat ol gutpela helpim long sait bilong helt kea long ol lapun. Yu lapun - famili i save lukautim yu long haus i go inap yu indai. Sampela daiosis na Rilijes lain, man na meri, i gat haus bilong lukautim ol lapun bilong ol. Brian i bin wok Bisop long tupela Daiosis. Em long Aitape na Pot Mosbi tasol, dispela tupela Daiosis i nogat spesie haus bilong lukautim ol siklain na lapun pris. Tu ol lain Fransiskan i nogat gutpela haus long mekim dispela wok. Long planti arapela kantri i gat spesel ples bilong lukautim ol lapun olsem, spesie haus sik, "nursing home," na ples bilong ol lain i ken indai (hospice for the dying). Ol Fransiskan bilong Australia i gat sampela spesel haus bilong lukautim ol lapun pris na brata. Na sapos ol i stat long go daun i gat rot long salim ol i go long "haus sik" o "nursing home" o "hospice". Planti misinari, i lapun pinis, i bin go daun long Australia na ol lain bilong Australia i wok long lukautim ol i go inap ol indai.

Long pinisim tok long lukautim ol Bisop, Pris na Rilijes i sik o lapun, mi gat sampela wari long ol PNG lain. Nau planti ol PNG man na meri, ol wok manmeri bilong Sios, i sik o lapun na i stat long indai. Olgeta Daiosis na lain Rilijes (Congregation) i mas redi long lukautim ol dispela lain. Nogut ol i salim ol i go bek long famili bilong ol na famili i mas lukautim ol. Ol i bin lusim famili na kamap Rilijes o Pris, Sios i mas lukautim ol taim ol i sik o lapun!

Long Krismas 1999 wok bilong mi long Holi Spirit Seminari Bomana i pinis, na mipela ol Fransiskan i bung na tok bai mi go mekim wanem wok nau. i gat tok long mi go lukautim wanpela peris long Aitape, tasol mi no amamas tumas long dispela. Wanpela brata i tok: "Yu save tok planti long nupela sik, HIV/AIDS; go wok long dispela ministri." Mi harim tok. Tok i gutpela, tasol mi gat wari na mi bekim ol: "Mi no gat save long dispela sik; mi no dokta o nes; mi no save bai mi inap mekim wanem kain wok bilong helpim!" Ol i tok: "Go lukim Asbisop Brian!"

Mi go lukim Brian. Em i harim tok bilong mi na em i tok: "Tingting bilong ol brata i gutpela. Yu go lukim ol sikmanmeri long bikpela haus sik long 3-mail; bai yu painim rot!" Em nau! HIV/AIDS ministri insait long Asdaiosis bilong Pot Mosbi i kirap. Tasol, mi nogat mani - nogat kar - nogat opis - nogat wanpela samting. i gat wok tasol, siklain i stap. Ol lain brata bilong mi na Asbisop i tok pinis. Inap nau! Wok i go het!

Bipo Brian i go long Australia, mi bin stori wantaim em long HIV/AIDS ministri. Em i bin sapotim dispela wok insait long Pot Mosbi na long kantri. Planti taim em i tokaut long yumi olgeta i mas sindaun gut na no ken hambag nabaut na kisim dispela sik o givim long narapela. Tu, em i strong long sapotim ol wok bilong lukautim ol siklain na orphan-lain. Sapot i bin kam long Asbisop Brian i bikpela tru na i mekim dispela ministri i go het long Pot Mosbi.

Tenkyu tru Brian long olgeta sapot na helpim i kam long han bilong yu. God i blesim na lukautim yu long taim yu malalo long Sydney.

# K1.2 milion EU mani helpim trening bilong ol distrik na LLG opisa

Veronica Hatutasi i raitim

**OL DISTRIK** na Lokol Level Gavman (LLG) insait long 5-pela provins long kantri nau i wok long kisim moa save long ol rot bilong wokim ol aplikesen long kisim ol guts na sevis fanding.

Dispela em bikos long K1.2 milion mani we Yuropien Yunien (EU) i givim i go long Sentrel Saplais na Tendas Bot (CSTB) long dispela yia bilong karimaut trening na awenes long provinsel, distrik na LLG level long 5-pela provins. Dispela em long Alotau long Milen Be, Vanimo long Sandaun, Lae long Morobe, Hagen long Westen Hailans na Lorengau long Manus.

CSTB em i dispela gavman bodi o ejensi we i save reguletim na kontrolim rot long ol guts na sevis i go aut na tu, oksen bilong ol gavman propeti olsem ol kar, ol bilding, ol hap graun na ol narapela samting bilong gavman.

Sampela long yumi i no klia tumas long wok we CSTB i save mekim, tasol dispela ejensi i gat bikpela wok long han bilong em.

Bot bilong em i gat pawa long tok oraitim o stopim go het bilong ol gavman projek, gut na sevis i go aut long pipel. Long dispela rot, ol disisen ol i mekim i ken sapotim o kamapim hevi long ol wok developmen na ron bilong sevis i go long ol pipel insait long ol komyuniti long nesanel, provin-sel, distrik na LLG level.

Manimak we CSTB i gat pawa long tok oraitim long ol kago na sevis em long K300,000 inap long K10 milion. Antap long K10 milion mak, ol tenda aplikesen i go long Nesanel Eksekutyutiv Kaunsel long tok oraitim o nogat.

Ol wan wan provins i gat ol Provinsel Saplais na Tendas Bot (PSTB) bilong ol na ol i gat pawa long tok oraitim manimak long K300,000 inap long K3 milion.

CSTB i hap bilong Fainens Dipatmen. Tasol long sampela taim tu, em bin stap olsem hap bilong Nesanel Woks.

Pastaim dispela bodi i gat liklik lain wok manmeri, tasol ol wok i go bikpela na nau, em gat 23 woklain i stap long Waigani opis, Westpek Benk bilding.

Bihainim K1.2 milion fanding bilong EU we ol bai yusim long dispela yia tasol, CSTB i stat pinis long las mun bilong ol trening na awenes wok long 5-pela distrik.

Wantok i bin stori wantaim tupela trena em, Raymond Aigil em Distrik Trena na Alice Asigau, em Kwalifikesen Opisa husat i wok long go aut long ol provins long kisim moa toktok long wok ol i mekim na wanem gutpela samting ol provins, distrik na LLG opisa i sindaun long ol trening kos i kisim long en.

Ol narapela lain long trening tim em long Trening Kodineta Veari Hitolo, Akaunting Opisa

## Tenpela eria we dispela trening i lukluk long ol em:

- Prokumen Plening na Disain i karamapim ol rot bilong bihainim long givim aut ol kontrak, glasim maket, ol kos na tok orait we het bilong ejensi i givim;
- Setifiket ov Inekspidiensi o long wok i kamap;
- Ol biding dokumen;
- Edvetismen;
- Risit na opim ol tenda;
- Ivaluesen bilong ol tenda na ol awot;
- Karimaut ol tenda;
- Kontrak edministresen;
- Lukautim ol komplek; na
- Komplaiens na Enfosmen



Wilfred Kakau na Bobby Seguna em Kontrak Kodineta husat i bin kam sindaun wantaim tupela opisa taim ol i stori wantaim Wantok Niuspepa.

"EU i bin lukim olsem i gat nid long strongim ol distrik na LLG level olsem na em i givim dispela fandin g lon g karimaut trening. Dispela em i namba 9 progrem we EU i fandin long en. Tripela ejensi em long Ateni Jenerels Opis (AGO), Rurel Developmen Opis (RDO) na CSTB i kisim fanding long mekim ol wok long strongim ol distrik na LLG ga level na ol i ken kisim ol guts na sevis na pilim olsem ol tu i kisim ol gutpela skul na save. Na yusim long ol wok developmen long level bilong ol long kamapim gut laip na sindaun bilong ol," Mista Aigil i tok.

"Long wanpela wik trening mipela i ranim long ol wan wan provins, ol distrik na LLG menesa i kam sindaun na kisim save long rot bilong bihainim long mekim Stendet Tendering Dokumen (STD) na ol Gaidlain na Regulesen.

"Long ol distrik na LLG level, rot long baim na kisim ol guts na sevis i no wok bikos ol opisa i no klia long ol rot bilong bihainim long wokim aplikesen. Na EU i lukim olsem i gat nit long distrik na LLG level na olsem, ol i putim mani bilong karimaut dispela pilot trening projek progrem we mipela i mekim nau," Mista Aigil na Mis Asigau i tok.

"Long ol trening mipela i kari-maut pinis, ol opisa i amamas tru na tok dispela trening i opim ai bi-

long ol na long namba wan taim, ol i kisim save long ol samting we ol inap save long ol pinis, tasol i nogat.

"Trening i wok long helpim ol long kisim save long ol rot bilong bihainim long aplai long ol Liklik Wok projek na ol narapela moa. Trening i ken helpim ol long kisim mani long Distrik Sevis Improvmen Progrem (DSIP) we i kam inap nau, ol i nogat save long bi-ahainim wanem rot na kisim long mekim ol wok long distrik na LLG level na sevis i ken kam long ol pipel long ples.

"Long trening, mipela i givim aut skul long Pablik Fainens Ekt na gaidlain bikos dispela bai helpim ol taim ol i putim tenda aplikesen bilong ol," Mista Aigil i tok.

Em i tok tu olsem ol "Very Small Works" o ol Lik Lik Wok em ol projek i karamapim manimak long K500,000 na i go daun we ol distrik na LLG level i ken aplai long ol olsem ol liklik "feeder" o han rot, ol klasrum na skul, helt senta na etpos bilding.

Mista Aigil i amamas tru olsem planti distrik na LLG opisa i wok long sindaun long ol trening na kisim save long ol samting we bai helpim ol i kisim sevis na developmen i go long ol ples stret.

"Mipela i amamas long Alotau we 35 opisa i sindaun long trening woksop, long Vanimo 30 na long Manus 25 man na meri wantaim i kam na dispela i gutpela stret.

"Mipela i amamas long kari-maut dispela trening woksop bikos em bai helpim ol menesa long ol distrik na LLG bilong yusim olsem gaid o stia long kamapim gut rot na wok long kisim ol sevis i go long ol distrik na LLG level," Mista Aigil na Mis Asigau i tok.

Kontrak Kodineta Mista Seguna i tok 5-pela ki poin we trening i givim long bihainim long wokim ol tenda aplikesen em long kisim veliu long mani, trenspersensi, gutpela bisnis dil na kompetisen na bihainim stretpela pasin we i fea.

Em i tok ol i laikim bai ol pipel long distrik na LLG level i mas save long "process" o stretpela rot we bai helpim ol long putim aplikesen long ol fan bilong kisim ol guts na sevis, samting we pastaim ol bikman na ol politisen tasol i save mekim.

CSTB i gat ol wokbuk we i gat ol samting bilong yusim long trening ol i givim aut i go long ol 5-pela provins we ol opisa i ritim na kisim sampela save bipo ol trening kos i kamap. Ol opisa long provinsel, distrik na LLG level Helt, Edukesen, Agrikalsa na Laipstok na Treseri em ol dispela lain bai yusim ol dispela buk.

Namba tu hap bilong trening em bai kamap gen long ol 5-pela provins na bai stat long neks wik Mande.

ALOTAU: (Antap) Wanpela hap long trening progrem em taim bilong tok-tok olsem poto i soim.

MANUS: Taim bilong rejista bipo long stat bilong trening long Lorengau, Manu Provins.

Ol Poto: CSTB

VANIMO: CSTB Trening long Vanimo, Sandaun Provins.

# Wok senis kamap long Kiunga taun

Nicky Bernard i raitim

**OL I SAVE tok Madang em buitiful, tasol Kiunga em pisful ples na ples bilong amamas, em toktok i kam long Memba bilong Not flai, Boka Kondra.**

Kiunga em liklik taun i stap insait long Not Flai long Westen Provins. Dispela taun em liklik, tasol wok bilong em long lukautim ol samt- ing em i olsem bikipela taun.

Dispela taun i gat bikipela bris bilong ol sip long go pas long en na lusim ol kago bilong bikipela maining taun long Tabubil. Olgeta samt- ing bilong OK Tedi main save kam long Kiunga pastaim na go antap.

Long las wik Fraide, ol pipol long Kiunga i amamas long opim nupela opis haus bilong distrik na provinsel gavman bilong Not Flai.

Dispela nupela haus bai kisim ples bilong olpela opis bilong ol we i bagarap na ros pinis. Nau dispela nupela opis haus em i lukautim tupela hap seksen bilong provinsel na distrik.

Long opim dispela opis, Minista bilong Faines na Treseri na memba bilong Yalibu Pagia Peter O'Neill, i bin go opim wantaim memba bilong Not Flai Boka Kondra, Duputi Gavana bilong Westen Provins, Administreta bilong Not Flai na sampela moa bikmanmeri.

Dispela nupela opis haus em ol lain long Tabubil enjiniaring i wokim wantaim ol nupela fenistsa bilong opis long ol wokmanmeri long wok long en.

OK Tedi main save helpim ol pipel bilong dispela tupela taun na tu Westen Provins wantaim royalti na dividen peimen.

Memba bilong Not Flai, Boka Kondra, i tingting nau long mekim Kiunga i kam bikipela taun na tu mekim olsem bai namba wantaim bilong Westen Provins i go kisim Daru ailan.

Em i tok sapos ol wok manmeri i lukautim

dispela nupela opis gut dispela tingting bilong ol long mekim Kiunga kam Het Kota bilong Westen Provins bai karim kaikai.

Mista Konda i tok tenkyu i go long ol wok man husat i kirapim gut gen dispela opis haus, na husat givim mani long sanapim.

Em tok tenkyu i go long OK Tedi Main na Minista O'Neill na gavman, na sampela ol lain husat i helpim long kamapim dispela opis haus na moa wok senis bai kamap long Kiunga taun.



OPIM NIUELA DISTRIK OPIS: Provinsel administreta William Goinau, Memba bilong Not Flai Boka Kandra, Misnista Peter O'Neill, Duputi Gavana bilong Westen Provins na wanpela wod kansola i sanap long fran bilong nupela opis bihain tasol long ol opim. (aninit) Ol manmeri na pikinini bilong Awini na Yongom sanap long fran bilong nupela distrik opis bilong ol. Poto Nicky Bernard



## have you tried Corned Tuna?

**NEW**

# DIANA

## Corned Tuna

*Kids will surely love it.*

*The taste of Corned Beef and Tinned Tuna in one!*



Serving Suggestion



Manufactured by:  
RD Tuna Canners Ltd.  
PO Box 2113, Madang,  
Papua New Guinea

# Oi Meri na Haus

**L**ONG MAN i stap gut, em mas gat kaikai, haus, klos, wara, edukesen na helt sevis. Dispela em ol samting we aninit long Humen Raits Dekleresen, ol gavman i mas givim long ol pipel bilong ol.

Long i gat haus bilong stap i wanpela bikipela humen rait, tasol long PNG, bikipela hevi i stap long ol taun na siti bilong wanem, haus i sot. Dispela i mekim na long ol taun na siti long kantri, yumi lukim tupela o tripela famili i paspas slip long wanpela haus we i no gutpela. Tu, pe bilong ol haus na long rentim haus long ol eben eria i antap tumas. Moa yet, ol lain i stap long ol setelmen insait long taun na siti i no kisim pawa, gutpela wara saplai na toilet samting na dispela i mekim PNG namba tu kantri long wol wantaim ol kain hevi long ol eben eria.

Olsem na ol pipel i nogat gutpela haus we ol inap long baim na stap long en i lukim olsem ol i bungim hevi tu long sampela ol humen rait bilong ol olsem rait long gat haus bilong stap gut long en, rait long edukesen, sekyuriti, famili, fridom long go long long hap ol i laik go long en na rait long developmen.

Nogat haus i save kamapim bikipela hevi long ol meri na pikinini. Bikos ol i nogat ples bilong go long en, ol i painim ol kain poroman we sampela i save mekim nogut long ol, ol i givim AIDS na dispela em ol i no bisi. Taim ol man bilong ol i dai, ol i rausim ol meri na ol pikinini long haus na ol i bungim hevi. Ol pikinini i kisim sik TB, hangere na bungim ol narapela sosel hevi taim ol i stap long haus i pulap pinis.



**Yut, Meri na Famili wantaim Lorraine Siraba**

Tu, ol meri em ol ikwal patna long developmen, tasol ol i no inap kisim haus bikos long mani hevi na graun long wokim haus.

Sot long haus i save kamapim hevi tu long ol ogenaisesen i givim sevis olsem ol wara na pawa atoriti husat i lusim bikipela mani bikos long iligel koneksen bilong wara na pawa, sola penel na kapa.

Watpo na dispela rait bilong ol meri long gat haus hevi i go het yet? i moabeta long ol meri i stat kwestenim ol momba bilong sapos ol i gat hausing plen na ol i mekim wanem samting long en. i moabeta long ol ogenaisesen i save lukautim ol rait bilong ol meri long kwestenim gavman long mekim moa haus we ol famili, moa yet dispela ol meri tasol i lukautim famili ol yet, i ken baim na stap long en.

Nau yet, gavman i nogat gutpela polisi long haus na olsem, hevi i stap. Na i moabeta gavman i wokim ol hausing polisi we i ken givim subsidi i go long ol meri na ol i ken gat haus.

Taim man o meri i gat haus bilong stap long en, bai gat gutpela sans long edukesen, helt, ikononik developmen na wok. Yumi noken pasim maus i stap long nit bilong yumi long gat haus tasol stat paitim dua long ol haus. i moabeta yumi toktok na askim ol lida bilong yumi long wanem samting ol i mekm long kamapim ol haus we pipel inap long baim na stap long ol bikos dispela em i humen rait bilong yumi.

# Oi meri kisim strong kamapim senis

Veronica Hatutasi i raitim

**SAMTING** olsem 16-pela meri na tupela man i bin bung long Mosbi long dispela wik bilong luksave long Intanesenel Komonwel (Commonwealth) De i bin pundaun long Mande Mas 14, 2011.

Bikos long het tok bilong dispela de em, Women, Agents for Change" o "Oi Meri em ol Ejen bilong Senis", Marianna Ellingson, husat i Dairekta Jenerel bilong Opis bilong Turisim, Ats na Kalsa na dairekta bilong Namba wan Supafan, i bin go pas long dispela meri grup we i bin lukim ol meri long gavman, NGO na praivet sekta i bung na serim ol stori bilong ol long ol kain wok ol i mekim i stap. Na rot we ol i ken kamapim sampela gutpela wok kamap long helpim ol meri, komyuniti na kantri.

Misis Ellingson i bin holim wanpela bikipela wok long Komonwel Sekretariat opis long London long 6-pela yia na las yia tasol em i kam bek long PNG.

Taim em i serim stori bilong em wantaim ol meri, em bin strongim ol long wok hat olsem ol ikwal patna wantaim ol man long ol wok go het bilong kantri.

"Yumi save tok ol man i



**MERI GRUP:** Marianna Ellingson, Ruth Waram na Lucy Bogari.

stap antap na yumi ol meri i aninit long ol i olsem glas banis na ol meri yet abrusim na go sanap long wankain level.

"Long opis mi bin wok long em long Komonwel, ol pipel i kam long 40 kantri i wok long hap. Resis i stap long olgeta eria na maski yu man o meri, yu mas sanap strong long winim luksave," Mis Ellingson i bin tokim ol meri olsem.

Naomi Faik-Simet i wanpela risetsa wantaim Nesenel Kalsarel Komisin i bin toktok long wok risets em i mekim long ol "traditional ritual"

o ol tumbuna kastom wok, namel long ol Wosera pipel long Is Sepik provins.

Em i tok risets i soim olsem long tredisenel model, i gat balens na luksave long mekim ol samting i stap. Na em i askim strong ol meri risetsa long go aut long ol ples na karimaut ol wok risets olsem.

Narapela bikmeri i serim ekspirians bilong em na tok long sait bilong wok, ol man i sapatim na givim luksave long ol meri olsem ol ikwal patna.

Lucy Bogari em Deputi Dairekta bilong Polisi na

Plening wantaim Foren Afeas na Imigresen Dipatmentaim em i tok tenkyu long Mis Ellingson long holim dispela bung i bin tok em i lukim Mis Ellingson olsem meri husdat i laik kamap ejen bilong senis.

"Em wanpela PNG tasol i bin wok namel long ol narapela intanesenel komyuniti long Komonwel i bin soim gutpela piksa long makim PNG. Em na nau i dai Se Tony Siaguru i bin go antap long bikipela level bilong wok long Komonwel na ol i kamap olsem ol ejen bilong senis," Mis Bogari i tok.

## Vanimo Daiosis selebretim Intanesenel Wimens De

OL MERI bilong Nambis Dineri bilong Vanimo Peris, Sandaun provins i bin sin-

daun long wanpela de progrem we i bin givim ol gutpelas tok skul bilong stiaim stap na sin-

daun bilong ol yet na ol famili bilong ol.

Dispela i bin kamap long las wik Tunde Mas 8 long selebretim Wol Intanesenel De bilong ol Meri.

Daiosisen Kodineta bilong Famili Laip Apostulet, Sista Suvartha Koturi (PIME Srs) wantaim ol fil treni i bin redim ol progrem bilong dispela de.

Olsem na olgeta Katolik meri bilong 4-pela Nambis Taun i bin bung wantaim long wanpela progrem bilong ol long Imakulet Hat bilong Maria Peris, Dasi.

Progrem i bin stat long 9 kilok moning wantaim Misa lotu we Bisop Alphonse Chaupa i bin go pas long en. Vika Jenerel bilong Daiosis, Pater Tommy Thomas, i bin givim liklik toktok bilong statim progrem bilong dispela de.

Fil treni, Hellen Karen tu i bin givim stori bilong ol meri husat i bin kirapim bel na wokim protes long 100 krismas i go pinis long Mas

8, 1857 long Nu Yok, Amerika. Bihain long liklik malolo, wanpela fil treni-bilong Famili Laip em Baltharsa Akus, i bin givim kaikai bilong tingting long as tok, Responsible Parenthood long olgeta Katolik meri inap long 2.30 apinun.

Bihain lon g toktok bilong Mista Akus, Misis Karen i bin givim toktok long Pro Laip.

Sista Suvartha i bin toktok strong long ol meri olsem ol i spesel tumas long ai bilong God. Tu, ol bin gat liklik ivaluesen o skelim na glasim grup toktok we i bin gat sering long sampela gutpela tingting.

Progrem i bin pinis long 3.30 apinun wantaim liklik kaikai we kodineta na lain bilong em i bin redim long en.

Sista Suvartha i bin tok tenkyu long ol meri bilong wan wan peris olsem Sen Joseph, Holi Kros taun, Santu Teresa Lido na Holi Trinita Baro Peris long go bung wantaim na stap insait long selebresen .

## GIVIM LONG HELPIM

ANZ Benk i givim K15,000 i go long wanpela Non Gavman Ogenaisesen i save helpim ol pikinini meri na ol turangu meri long skruim skul bilong ol long sekonderi na teseri level na ol i ken kontribuit long developmen bilong ol, komyuniti na kantri. Siameri bilong ANZ Koporet Responsibiliti Komiti i lukluk long man na meri i mas gat wankain sans, Manoa Kamikamica, i tok ANZ Benk bai sapatim ol meri i skruim wok insait long wok ples bilong ol. "Mipela long Soroptomis i bilip long visen bilong ikwaliti, edukesen na sapatim ol meri na ol pikinini meri i kisim pawa long



sanap long wankain level na kontribuit long olgeta level bilong developmen bilong kantri," Misis Kamikamica i tok.

Presiden bilong Pot Mosbi Soroptomis, Bubby Mohan

taim em i tok tenkyu i bin tok donesen hia bai helpim tru ogenaisesen long sapatim ol yangpela meri long inapim ol gol bilong ol.

Na tu, long mekim ol gutpela disisen long kamapim gut

laip bilong ol.

ANZ Benk i save helpim tu ol narapela meri ogenaisesen olsem PNG Women in Bisnis wantaim mani helpim.

**Poto: ANZ Pablik Rilesens Opis**

# Moramora i kamap teknikel kolis

MORAMORA Vokesenel skul long Wes Nu Briten i kamapa nau olsem wanpela tenikel kolis bihainim tok orait bilong neseneledukesen bot.

Dispela i kamap bihainim wok bilong Wes Nu Briten Gavana, Peter Humphreys na provinsel gavman i putim edukesen na helt sevis olsem ol eria we ol bai givim bikpela lukluk long en. Dispela em bikos ol i lukim tupela sevis eria em ol ki draiva bilong divelopmen long provins.

Bihainim dispela lukluk, gavman bilong Gavana Humphreys i bin putim askim ripot long apgretim ol vokesenel skul i go long ol teknikel kolis we neseneledukesen bot i tok oraitim pinis na Moramora Vokesenel skul long Wes Nu Briten i namba wan long ol.

Long opening bilong nupela klasrum blok bilong Yunivesiti long PNG Kimbe Yunivesiti Senta long dispela wik, Gavana Humphreys i bin tok gavman bilong em bai skruim program bilong gavman bilong em we i givim TESAS program skolasop sapat long ol sumatin i go long yunivesiti. Na tu, long ol pikinini long provins husat i no bin gat sans

## ... Humphreys sapatim strong helt na edukesen

long skul long planti yia.

Long dispela yia, Wes Nu Briten Provinsel Gavman i givim K2.5 milion long skruim TESAS program. TESAS program bilong provins em i wankain olsem dispela skolasip program bilong neseneledukesen long helpim wantasim ol skul fi long teseri level.

Las yia, gavman bilong Gavana Humphreys i bin givim K1.5 milion long provinsel TESAS program bilong em na narapela K500,000 long apgretim na ol tisa na ol pablik sevan i kisim moa trening long Kimbe Yunivesiti senta na ol i ken mekim moa gut wok bilong ol.

Provinsel Edministretiv sekreteri, Stephen Raphael, i wanbel wantaim ol samtign we gavana i mekim na tok ol i luksave olsem divelopmen na apgretim ol tisa i bikpela samtign.

"Mipela i gat fanding pinis bilong stat apgretim ol tisa. Mipela i luksave olsem welfea bilong ol tisa i bikpela samtign na mipela i lukluk tu long bildim wanpela tisa haus taim



mipela i bildim wanpela klasrum long provins.

"Bai em i hat bikos long salens we ol ples i stap long maunten, bikples na ol liklik ailan, tasol bai mipela i go het na wokim ol samtign olsem i stap long plen," Mista Raphael i tok.

**SAPOTIM EDUKESEN: Gavana Humphreys i traिम wanpela long ol nupela kompyuta long nupela kompyuta leb i stap long nupela klasrum bilding ol bin opim tasol.**

*Poto: UPNG Pablik Rilesens*

# Laspela toksave long salim ol tisa stat wok fom

LASPELA toksave i go nau long ol provinsel Edukesen Edvaisa long salim hariap ol fom bilong ol tisa long statim wok long 2011 skul yia i kam long Waigani Peirol brens bilong Edukesen Dipatmen.

Dispela em long Risamsen bilong Duti o wok Samari Sti (RoDSS) fom ol tisa i bin pulumapim long namba wan de ol i statim wok long Mande Janueri 24, 2011.

Dokta Pagelio i wokim singaut bikos mande Mas 7, 2011 detlain bilong ol fom long stap long Peirol brens i abrus pinis na sampela provins i no salim ol dispela fom yet i kam.

"I kam inap tude, sampela provins i no salim ol dispela RoDSS fom yet olsem detlain ol bin givim pinis long em," Dokta Pagelio i tok.

Pastaim ol bin givim Mande Februeri 28 na bihain taim planti provin s i no

salim ol RoDSS fom, ol bin putim Mande Mas 7 olsem namba tu detlain. Tasol sampela fom bilong sampela provins i no kam kamap yet long Waigani.

Olsem na Dokta Pagelio i askim strong ol provinsel edukesen edvaisa long salim wanpela opisa i kam wantaim ol fom long Waigani na ol i ken stretim ol dispela RoDSS fom na data bilong ol tisa na wokim apdet long ol tisa i stat bek wok long dispela yia.

Em i tok dispela ol RoDSS fom tasol bai tokaut long husat tisa i stat wok pinis na ol i no inap long rausim ol long peirol nating.

Tupela wik i go pinis, Dokta Pagelio i bin salim toksave i go aut long ol provinsel edukesen opis bilong wokim fainol sekap long ol RoDSS fom bilong ol tisa lon g lukim olsem ol i sainim ol na salim i kam long Peirol brens bilong Edukesen hetkwata long Waigani.

## Wanpela wik bung bilong ol Praimeri skul tisa kolis bos

WANPELA wik edukesen bung i kamap nau long Mas Gels Risot ausait long Mosbi siti i wok long lukluk long ol salens na ol wok kamap long ol praimeri tisas kolis long kantri.

Ekting Edukesen Sekreteri, Dokta Joseph Pagelio, i tok bung i save kamap long wanpela taim olgeta yia na long dispela yia, bung i bin stat long dispela wik Mande na bai pinis tumora, Fraide Mas 18.

Em i tok dispela bung i bilong 10-pela praimeritisas kolis long kantri i karamapim tupela nupela kolis olsem Enga na Sekret

Hat long Bomana.

Dokta Pagelio i tok 10-pela kolis prinsipel na 9-pela opisa bilong Edukesen Dipatmen hetkwata i sindaun long dispela Mas Gels Risot bung.

Bun g long nau i lukluk long tripela eria olsem ol tingting bilong ol i mas go insait long Nesenele Kurikulum Gaidlain na Nesenele Asesmen gaidlain bipo ol i prisanim i go long Nesenele Edukesen Bot bilong Stadis i bung long glasim ol samtign, sumatin enrolmen, ol skul bilding, makim ol leksera na ol samtign olsem long daunim ol hevi na ol projek we bai kisim mani i go insait long kolis.

## Nogat senis long tisa apoinmen na promosen

BAI NOGAT senis i kamap long tisa apoinmen na promosen long ol provins long dispela yia, olsem i stap long Sekula Namba 3 2010 we i gat ol toktok long makim ol tisa apoinmen na promosen.

Olgeta Provinsel Edukesen Bot (PEB) long ol skul long kantri na ol Gavaning Kaunsel long ol nesenele na provinsel institusen long kantri i mas glasim gen Sekula Namba 3 2010 long makim apoinmen bilong ol tisa long ol wan wan provins.

Kea teka siaman bilong Tising sevis Komisn (TSC), Jerry Kuhena, i wokim dispela toktok bikos em i laikim bai ol edukesen atoriti i bihainim samtign i stap long sekula Namba 3 2010

na larim ol tisa i gat ol pemanen posisen, tasol wokim senis tasol sapos i gat nit long en.

Ekting Edukesen Sekreteri, Dokta Joseph Pagelio na pastaim siaman bilong TSC Michael Pearson, i bin sainim dispela sekula long las yia.

Aninit long Sekula Namba 3, 2010, ol bin salim tok i go long ol institusen na ol gavaning bodi olsem ol noken pablisim 2010 Vekensi Geset bikos ol i laikim bai ol institusen i noken mekim ol senis long ol apoinmen long ol pemenen posisen, tasol wokim senis long ol ekting posisen sapos i gat nid tru long en.

Mista Kuhena i laik tokim tu ol bot na gavaning kaunsel long promosen bilong ol elementeri

skul i mas beis long tisa i mas rejista na i gat setifiket long Elementeri Tising, i mas gat gutpela ripot taim em i stap long ekting level, sinia level na ol elementeri tisa treni em ol i ken makim long ekting posisen sapos i nogat rejista elementeri tisa i stap.

Mista Kuhena i tok ol noken transferim ol elementeri tisa i go long ol narapela skul.

Em i tok tu olsem ol beis level ekting apoinmen long ol komyuniti, praimer, hai, sekonderi na vokesenel senta i mas stap long ol ekting posisen bilong ol. Na ol nupela greduet i noken mas kisim ples bilong ol dispela tisa husat i bin winim posisen na wok i stap.



## SATAN i STAP YET?

WANPELA wik bihain mi go nupela long Hanuabada, mi harim sampela i nok long haus dua long wanpela Sarere. Taim mi opim, foapela yangpela man i stap. Wanpela bilong ol i tokim mi olsem: "Mipela 20-pela yut bilong Sentral Provins i kam bihainim wanpela kos. Tasol nau mipela i nogat mani long baim bas na go bek long ples. Narapela yut i wetim mipela long Base Seal".

Mi askim ol husat i bin salim na ol i tok provinsel gavman. Wantu tasol na wanpela bilong ol i tok: "Nogat Pater. Paris pris i bin salim mipela i kam".

Nau mi bilip long husat? Gavman o provinsel gavman o peris pris? Taim mi tok olsem, wanpela bilong ol i kamap klostu moa long dua na traim long tok strong long mi olsem wanem samting ol i tok i tru, gavman na peris pris. Tasol taim em i kamap klostu, mi smelim mariwana i kam aut long maus bilong em.

Olsem na mi askim em sapos ol i bin smokim mariwana. Tasol ol i tok nogat. Mi tokim ol "Yupela yangpela ya! Noken trikimi mi. Ating yupela i sot long mani long baim mariwana, olsem na yupela i kam na trikimi mi. Yupela i kamap aste tasol ya? Olsem na noken trikimi mi. Mi stap nupela yet long Hanuabada, tasol mi lapun pinis long PNG. Taim mi kamap long PNG, mama bilong yupela i no karim yupela yet."

Mi askim ID o pas bilong gavman o peris pris. Ol i tok ol i nogat ID na nogat pas bilong gavman na peris pris. Olsem na mi tokim ol: "Em inap. Tenkyu long kam na lukim mi. Mi gat narapela wok i stap yet. Yupela go na askim gavman na peris pris bilong yupela long givim bas fea bilong yupela".

Long apinun, mi bungim ol klos long lain, mi no painim tawel bilong mi. Bihain long sampela wik, taim mi wokabaut kam bek long lukim ol sik manmeri na lapun long Rauguri Setelmen, mi stop na stori wantaim sampela yangpela long maket klostu long tanel. Mi tingim pes bilong wanpela bilong ol, na mi askim em: "Mi bin lukim pes bilong yu wantaim narapela tripela yangpela i bin kam long haus bilong mi askim bas fea bilong go long Sentrel. Em i tok yes. Na mi askim em: "Taim yupela i lusim haus bilong mi, ating yupela i kisim tawel bilong mi long lain a?" Em i bekim stret na i tokim mi olsem: "Bikos yu no givim mipela mani, olsem na mipela kisim tawel bilong yu na salim, kisim K4 na mipela baim mariwana long smokim". Mipela olgeta i lap.

Fani stori a? Tasol dispela em i rot Satan i save wok insait long manmeri. Em i traim Jisas long ples nating, na em i no win (Mt 4: 1-11). Tasol em i bin yusim narapela manmeri long bagarapim wok na tok nogat long Jisas o lusim Jisas. Satan i bin yusim Judas long salim Jisas i go long ol birua. Long Paradais, em i bin yusim Iva long bagarapim laip bilong Adam na tupela i pundaun long sin.

Inap long dispela taim, Satan i stap yet. Em i save yusim yumi long wokim pasin nogut olsem tok nogut, bikheth, pamuk, spak na pait, tok baksait, nogat rispek long narapela, na planti moa. Noken tingting olsem Satan yet bai kam na traim yumi olsem em i bin wokim long Jisas.

Em i bin yusim 4-pela yangpela man long trikimi mi. Ol i no inap trikimi mi olsem na em i bin yusim ol gen long stilim tawel bilong mi. Satan i klewa tumas.

Long dispela taim bilong Len, God i yusim yumi long mekim gut. Tasol tingim tu Satan bai traim hat long yusim yumi tu. Olsem na stap was olgeta taim.

# Man i maritim planti meri na rilijes fridom

i kam long Zenit Nius Ejensi, Vatiken

WANPELA grup long Momon Sios long Kanada (Canada) i laikim bai ol i tok oraitim pasin bilong wanpela man i maritim planti meri olsem hap bilong rilijes fridom.

Long sampela mun nau, Britis Kolombia (British Colombia) Suprim Kot Jas, Robert Bauman, i wok long harim ol toktok sapos lo i ken tok oraitom "polygamy" o man i maritim planti meri.

Bountiful komyuniti bilong Fundamentalism Momon Sios i tok aninit long Sata bilong Raits na Fridom bilong Kanada, em i min olsem olsem long hap bilong rilijes rait bilong ol, em i orait long ol man i gat planti meri.

Dispela Momon Sios grup i gat samting olsem 10,000 memba long en

long Amerika na Kanada. Na samting olsem 1,000 i save stap long Bountiful.

Britis Kolombia i gat lo bilong 19 senseri yet we i tambuim man i maritim planti meri, tasol em i no bisi long samting we grup i wokim bikos ol i pret olsem nogut lo i no bihainim mama lo. Ol atoriti i bin senisim tingting bilong ol na sasim tupela man long brukim lo tai mol i maritime moa long wanpela meri. Ol bin rausim sas bikos long teknikel graun.

Ol atoriti long Britis Kolombia i no laikim bai lo i glasim gen disisen tasol ol i askim hai kot long glasim sapos dispela lo i agensim "polygamy" i bihainim mama lo o nogat. Olsem na nau kot i pinis long harim keis long tupela sait wantaim.

Na sapos kot i rausim lo, i gat pret olsem ol lain i laik maritim planti meri bai pulap long Kanada na dispela bai kamapim hevi long sosaiti, Kraun loya, Craig Jones, i bin paitim toktok olsem long kot.

Mista Jones i tok komyuniti long Bountiful i bin gat planti hevi long ol pikinini meri we krismas bilong ol i liklik na ol i no inap yet long maritim, tasol ol i maritim pinis, ol i karim bebi na ronim ol man na ol yangpela manki.

"Ol dispela hevi i kamap bikos long wanpela man i maritim planti meri," Mista Jones i tok.

"Poligamy" i mekim planti yangpela man i stap nating na nogat sans long maritim na statim famili," loya i makim opis bilong Atoni Jenerel long Kanada i tok.



Ol Katolik meri bilong Nambis Dineri, Vanimo, i bung long Dasi Peris na harim toktok bilong Sister Suvartha Kotturi long wanpela progrem bilong ol.

## Ol Pesinis misinari i selebretim Silva Jubili

IMAKULET HAT bilong Mary Peris Dasi long Vanimo, Sandaun provins i bin selebretim 50 yia Golden Jubili bilong ol Pasenis (Passionist) misinari kongrigesen long PNG long Sande Mas 5.

Planti pater, rilijes na Katolik pipel long ol peris bilong Vanimo Daiosis i bin bung long dispela Sande insait long wanpela misa lotu na ol toktok long tokim stori bilong ol namba wan misinari i bin kam long PNG long Mas 4, 1961. Ol i kam long llo Nambis long Vanimo long sip olsem long Lae.

Stori ol i harim em 5-pela misinari i gat long em 4-pela pater na wanpela bruder i stap long grup tassol nau, tripela pater na wanpela bruder i dai

pinis. Wanpela tasol em Pater Jeffrey Forale Cp i stap laip tude. Pastaim ol bin kolim em Pater Cletus Forale husat nau i Supiria bilong ol Pesinis long kantri Vietnam.

Bikos long gutpela wok ol paionia Pesinis i mekim long planim Gutnius bilong Bikipela long PNG, kongrikesen i gro na ol i stap long Vanimo Daiosis na Asdaiosis bilong Pot Mosbi.

Jenerel Konsalta bilong ol Pesinis i bin kam long Rom long stap wantaim ol brata Pesinis long PNG bilong makim golden jubili selebresen we Bisop bilong Vanimo, Bisop Cesare Binivento, i bin go pas long misa lotu long dispela de.

Sampela ol Pesinis pater na bruder

husat i bin wok pastaim long PNG na i stap ovasis i bin kam bek long stap insait long 50 yia selebresen.

Manmeri long ol nambis ples olsem Ossima Peris i stap long bikples i bin go stap long selebresen tu long Dasi Peris.

Bihain long misa lotu na ol toktok, ol bin gat ol tumbuna singsing na danis, pilai drasma na ol eksen singsing. Ol Pesinis i bin amamas tru long selebretim 50 yia anivesari wantaim ol pipel.

Long pinisim selebresen, ol bin gat kaikai we ol wan wan peris i bin redim. Na bipo ol i lusim peris graun na go long ol wan wan ples bilong ol, ol bin kisim blesing long Pater Clement Baron Cp.





**TOK PISIN NEWS**  
from Radio Australia

radioaustralia.net.au

Harim TOK PISIN long  
Radio Australia  
**101.9FM**  
Port Moresby

**Tok Pisin Service**

6am - 7am 6080; 7240(KHZ)

7pm - 9pm 5995; 6020; 9710; 1280(KHZ)

## Toktok i go long ol Pasifik komyuniti long noken wari long nuklia posin

TOKTOK i go long ol komyuniti long Pasifik long noken wari long rediesen o nuklia posin i kam long ol nuklia pawa stesen long Japan.

Dairekta bilong instituit bilong Nuklia Saiens long Yunivesiti ov Sidni, Dokta Reza Hashemi-Nezhad, i tok em i ting wanem bagarap yumi nap kisim i abrus pinis.

## Sir Michael Somare tribunal i malolo bilong skelim tingting

LONG Papua Niugini, wanpela traibunel em i bin wok long glasim ol tokwin agensim Praim Minista long miskondak o in o mekim gut wok, nau i malolo bilong lukluk na tingting long wanem samting ol i painim aut.

PNG niusman, Liam Fox i ripot olsem lidasip traibunel em i wok long painimaut moa long ol tokwin olsem, Sir Michael Somare i bin let long givim ol fainensal ritens namel long 1992 na 2004.

Prosekusen i bin tok sampela taim Sir Michael i no bin toksave long pe bilong em o long benk balens bilong em, maski Ombudsman Komisin i save askim em long tokaut long dispela.

Long Tunde, Sir Michael i bin tokim traibunel olsem, em i save givim ol anuel riten bilong em olgeta taim.

Em i tok, wanpela rot tasol bilong em bilong kisim mani inap long 40yia em long palamen pe bilong em, na em i no tokaut long hamas pe em i save kisim bikos mak bilong pe bilong em i stap long pablik rekot.

Bihain long harim ol laspela sabmisin o toktok, traibunel i bin toke m i ting bai tokaut long wanem samting em i painim long pinis bilong wik.

## Save The Children i mekim apil long helpim ol pipel long Japan

WANPELA biknem welfe ogenaesen Save The Children, i mekim wanpela apil na askim long 5 milion Australia dola donesen i go long helpim ol pipel i bungim bagarap long Japan.



Ol i salim ol pipel bilong Australia i go pinis long skelim ol wok helpim na we ol i ken helpim ol pikinini na famili bilong ol insait long eria sunami na guria i bin kamapim bikpela bagarap long en.

Tokman Ian Woolverton i stap pinis insait long nambis distrik Asahi, is long Tokyo.

Em i tok lain bilong em bai kirapim ol eria we ol pikinini i ken pilai na seif taim papamama i stretim ol rejistresen bilong kisim disasta rilif eid.

## Solomons PM salim belsori long Japan



SOLOMON Ailans Praim Minista, Danny Philip i salim belsori bilong em i go long Praim Minista, gavman na pipel bilong Japan, bihainim bagarap i kam long guria na sunami long Fraide i go pinis.

Long wanpela pas em i raitim i go long Japan Praim Minista Naoto Kan, em i tok maski Solomon Ailans i nogat planti risoses, gavman bilong em i wok long tingting nau long hau bai helpim Japan long kirapim bek ples, na stretim gut gen ol samting bihainim dispela disasta.

## 200 tausen pipel i stap long 'imejensi selta'



MOA long 200 tausen pipel bilong Japan i stap long ol imejensi selta, taim ol i salim moa soldia i go aut long helpim ol savaiva bilong sunami.

Wanpela rijinal polis sif i tok namba bilong ol pipel i dai ating bai go antap long 10 tausen insait long Miyagi eria.

Ripot i kam long Tokyo i tok olsem em na midia tim bilong ABC i bin stap long kostal taun bilong Asahi, 80 kilomita not is bilong Tokyo long bik moning i go nap long apinun.

Long dispela hap, dispela traipela si bruk long samting olsem 5-pela mita i bin hamarim ol baret long nambis, na i go insait moa long taun na bamim na bagarapim ol haus na kar wantaim ol pising bot long haba.

Samting olsem 70 kantri na intanesenel eid ogenaesen i ofa pinis long helpim Japan long dispela bikpela disasta.

## Marianas gavman tokim pipel, noken wari long nuklia posin

Gavman blong Northern Marianas, i askim ken pipal blong en long noken wari na i tok, ol trabal long nuklia pawa stesen long japan ino kamapim sampla bagarap em Commonwealth of Northern Mariana Islands bai wari long en.

Ekting Gavana Eloy S Inos i tok gavman i wok long galasim gut nuklia heve long Japan na i kirapim pinis wanpela tim blong redi long wanpla imejensi plen blong sapos sampla trabal i kam long Northern Marianas.

## Tokyo gavman tok nuklia posin mak long siti i bikpela liklik

LOKOL gavman long Tokyo i tok mak bilong rediesen o posin i kam long biktaun

bilong Japan, i bikpela liklik moa winim mak ol i save kisim.

Dispela toktok i kam taim ol atoriti i traim hat tru long pasim nuklia meltdaun long Fukushima nuklia pawa stesen, em guria i bin bagarapim las wik long not bilong kantri.

Mak bilong rediesen i stap long nogut mak stret raun long pawa stesen, bihain long sampela hap long en gen i pairap na paia i kamap insait long en.

Ol saveman long ol kain taim, ol weda opisal i tok ol win i kam long wes i wok long karim dispela rediesen i go long Tokyo.

Long toktok bilong em ol i tanim long tok inglis, kabinet sekreteri Yukio Edano i bin askim pipel bilong Japan long stap isi na noken wari.

## French Polynesia askim Frans long glasim gut Mururoa

FRANS Polenisia i wok long askim Frans long givim strongpela tingting long wanem ol bagarap i ken kamap sapos ol nuklia samting bilong en long Mururoa Atol, we oli bin save testim ol nuklia bom, i bruk na nuklia posin i kam aut.

Long wanpela pas em i raitim i go long presiden bilong Frans, Frens Polenisia Presiden, Gaston Tong Sang, i bin askim Frans gavman long salim ol saveman i go long Mururoa Atoll bilong glasim na skelim kwik sefti bilong dispela ples.

Pas bilong em i tok wanpela Frans nuklia sefti opisa i bin tok pinis olsem, sapos dispela atol i bruk, em i ken kamapim ol traipela si bikpela bilong ol bai 20 mita na inap kapsaitim nuklia posin long ol pipel long Tureia atol.

Mista Tong Sang i tok i gat wari na belkros i stap namel long pipel, na em i askim Frans gavman long wokim wanpela waning sistem.

Long yia i go pinis, nuklia tes veterans ogenaesen, Moruroa e tatou, i bin tok lukaut olsem, nuklia posin i ken kamapim ples bikos Moruroa nau i go daun pinis long solwara.

Presiden bilong Moruroa e tatou, Roland Oldham, i tok Frans i mas mekim samting nau tasol.

## Ol asailam sika i askim Fridom

LONG namba tu de, ol kalabus lain long Christmas Island i bin autim bikpela bel krai bilong ol long fridom bilong ol.

Namba tu grup bilong ol man i ronawe long Not Wes Poin Ditensen Senta dispela wik.

Long Fraide nait, 150 man i ronawe tasol samting olsem 60 bilong ol i go bek long Senta.

Ol i tok em i kisim longpela taim tru long stretim ol asailam aplikesen bilong ol na i tok ol i mas larim ol i go fri.

**Pacific BEAT**

4. 5. 6am & 4pm. 5pm  
including sport

Listen to Radio Australia  
101.9FM Port Moresby

Radio Australia current affairs programme which focuses on island nations, bringing you morning and evening coverage of Pacific current affairs including interviews with political leaders, newsmakers, and the people who make the Pacific beat.



# Gris bilong kempen stat pinis

Gutpela long lukim olsem planti memba i wok long givim aut mani long kamapim ol sevis, projek na ol wok developmen insait long ilektoret bilong ol wanwan insait long kantri.

Kantri bilong yumi i sot long planti sevis na developmen tasol Gavman i gat taim bilong em yet long kam na stretim. Wampela gutpela taim long ol memba em long wampela yia bipo long nesenel ileksen taim. Olsem na ol memba i wok long kamapim ol liklik projek nau long ol ples we yu yet inap lukim long en. Ol no mekim olsem long las yia i go, ol mekim long 2011 nau.

Tasol bikpela askim em inap olgeta memba bilong palamen i soim ripot long wanem wanem kain projek na sevis ol bin kampim pinis wantaim ol K10 milien ol bin kisim long 2007



i kam inap long 2010 nau?. Soim ol pepa wok na soim tu wok i kamap na stap long we?. Sapos nogat, ating bai dispela K10 milien ol bin kisim long 2011 baset em bilong tromoi tasol long pulim vot na sapot tasol long winim bek 2012 nesenel ileksen.

Mi ting opis bilong ORD o Opis bilong Rurel Developmen noken skelim mani nating long ol memba long dispela yia long ol projek o Fainens Dipatmen noken salim mani go nating long ol distrik we nogat wampela samting bin kamap wantaim ol K10 milien ol bin kisim pinis long en.

Sampela projek bilong ol memba long 2010 noken kisim o yusim mani bilong 2011 baset bikos 2010 gat

mani bilong em yet na memba mekim wanem long dispela na i no givim go long kain projek olsem?. Wanwan yia mas gat projek bilong ol yet wantaim mani bilong ol yet.

Nau yumi ken lukim olsem ol memba bai giaman tru na kamapim kainkain projek we i nogat plen long en o i no inap stap longpela taim. Em ol gris projek tasol long mekim yumi amamas na givim vot long ol. Pasin bilong baim vot em ol bai yusim mani bilong pipel long kamapim wok olsem projek na sevis long dispela taim.

Sapos ol bin mekim olsem long 2009, 2008 na 2007 we bikpela taim na bikpela mani bin kamap na go pinis bai orait. Blong wanem na las minit?.

Yumi noken ai op na amamas o seksek long dispela kain liklik helpim

nau bikos em mani bilong baim vot tasol long grisim yumi long votim ol memba kam bek long palamen.

Dispela Gavman bilong Somare mas mekim ol samting long lukautim gut ol Gavman memba bilong em. Olsem na ol inap sapotim ol yet wantaim mani long go aut na grisim yu wantaim ol las minit projek.

Em mani bilong yumi ol pipel tasol politiks i go pas long en olsem na ol bai yusim long laik bilong ol na wei bilong ol long grisim yumi tasol.

Lukluk stap, kainkain projek bai kamap long hap bilong yu. Ol kendidet tu bai mekim kainkain pasin na stail tu tasol ol memba nau bai go moa yet bikos ol gat mani na sapot bilong dispela Gavman i stap. Noken wari long ol, amamas long kisim kaikai tasol na vot em stap long han bilong yu yet.

## WANTOK KOMENTRI

### Taim nogut i kamap long olgeta hap kona

SAPOS yumi no bin luksave long ol hevi i wok kamap long mama graun, nau, yumi pilim taim bikpela guria i seksekim kantri Japan.

Em i wampela kantri i stap longwe liklik long yumi, tasol em i wansolwara kantri bilong yumi tu.

Manus na Wewak i bin kisim hevi bilong ol bikpela guria i kamap long Japan, taim arere bilong sunami o haiwara i abrusim mak na bagarapim ples.

I gat planti toktok i kamap pinis long PNG gavman i go pas long ol wok bilong lukautim na banisim ol diwai bilong yumi.

Na las yia i lukim planti belkros na pait i kamap long ol wok kabon treding. Wampela samting we i no karim wampela gutpela kaikai yet. Na bai yumi no inap lukim wampela gutpela winmani long en inap yumi klia gut long rot bilong kirapim dispela kain samting.

Olgeta ol toktok ol lida bilong yumi wok mekim long pulim ai na tingting bilong wol i kam long hevi yumi gat long solwara mak i go antap, ating i no pairap strong tumas.

Yumi bin kisim skul pinis long ol birua bilong mama graun, long maunten paia i pairap long Is Nu Briten, bikpela ples drai i bin holim kantri bilong yumi, na namba wan taim bikpela sunami i bin kamapim birua long Aitape.

Olgeta ol dispela birua i soim yumi olsem yumi no narakain long ol arapela kantri long wol.

Ol bikpela kantri we nau i go pas long wol, ol i bin gat busgraun bipo. Ol i bin gat planti gris long graun, na planti bus na diwai i sanap.

Nau ol i nogat. Ol i daunim ol diwai, digim rausim ol ston na arapela gris bilong graun, na pinisim olgeta abus long solwara bilong ol.

Sapos yumi sindaun gut na skelim tingting long en, bai yumi luksave olsem ol bikpela kantri long wol husat i go pas long wok maining, na wok pulim pis, em ol i pinisim olgeta gris long graun bilong ol pinis, na nau ol i kam painim yumi.

Olgeta wok o senis yumi kamapim long mama graun, bai mas i gat kambek bilong em.

Ating i mobeta yumi pipel, na gavman wantaim i mas luksave long dispela.

Pasin bilong bagarapim na pinisim olgeta samting long graun i noken kamap long painim moa mani, o kisim moa biknem long ol bikpela risos developmen projek.

Gavman i mas redim kantri long bungim ol bikpela birua bilong mama graun.

Sapos yumi no redi, bai yumi bagarap.

## WANTOK

Published Weekly, Thursday, for Word Publishing Company, Ltd. P.O. Box 1982, Boroko, NCD Papua New Guinea

Telephone: (675) 325 2500

Fax: (675) 325 2579

Email: [editorial@wantok.com.pg](mailto:editorial@wantok.com.pg)

Pe bilong wampela yia 52 niuspepa

|                       |             |
|-----------------------|-------------|
| <b>Ples:</b>          | <b>Air:</b> |
| PNG                   | K220.00     |
| AUSTRALIA             | US\$110.00  |
| ASIA PACIFIC na JAPAN | US\$150.00  |
| AMERICA na EUROPE     | US\$210.00  |

General Manager Elizabeth Konga

Editor Neville Choi

Published at Section 58, Allotment 3 Office 2, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

# Jiwaka i gat bilip long humen risos

## Bustin Anzu i raitim

**TRAIPELA blek pela klaut i pas antap long Kumbun maunten. Ol pisin i wokim nois na ples i go olsem tudak na kol win bilong apinun i laik ron i kam insait long longpela trausis bilong mi.**

Na ples i laik tudak liklik na em laik kapsaitim tasol i bin lukim olsem dispela invaitet ges i no kam insait yet, olsem na ren i wet i stap.

Na taim em i kam insait, traipela mama bilong ren i pundaun kapsait. Dispela gutpela san bilong Millep i go lus nating na ples i wet gen.

Tasol dispela i no poretim dispela invaitet ges. Em igo lukim ol mangi i singsing na pilai gita, ol winim mambu flut, ol string ben na ol mama singsing.

Planti long ol dispela pilai, em ol sumatin yet i putim long dispela taim.

Taim ol invaitet ges i kisim sia bilong ol long gren sten, ol blekpela klaut i lusim maunten Kumbun na ples i klia na sain gen.

Dispela ol samting i bin kamap long taim Memba bilong Palamen bilong Not Waghi Benjamin Mul i laik opim tupela haus slip bilong Millep Luteran Hai Skul long insait long Nondugl, nupela Jiwaka provins.

Na misin hai skul i ron 6-pela yia na i gat moa long 500 sumatin bilong Papua Niugini i kisim save long dispela bus skul. Na planti bilong ol samting bilong skul olsem klasrum em hap hap samting, samting bilong bus na stoa wantaim em ol i bin wokim.

Long Februeri Sarere 26, MP Mul i givim nupela laip long skul, wantaim tupela haus slip bilong ol mangi na meri.

Dispela tupela haus slip i kos olsem K100, 000. Na Mul i tok em bai putim narapela K100, 000 long narapela moa haus slip bilong ol sumatin.

Ol man long ples yet i wokim dispela tupela haus slip.

Nupela polis Komanda bilong Jiwaka Superintenden Sylvester Euga na Not Waghi distrik administratif John Kumi, sampela polisman na ol niuslain i poromanim Mul long dispela wokabaut bilong em.

Mul i tok ol sumatin em namba wan human risos bilong ol na ol mas lukautim ol gut long skul na ol bai kisim gutpela save long kirapim nupela Jiwaka provins bilong ol.

Em i bin tok long lukim gutpela developmen insait long provins, ol samting bilong skul em ol mas stretim gut.

"Mipela mas lukautim welfea bilong ol sumatin long skul. Human risos em mipela mas bilip long en. Dispela tasol i ken senisim provins.

"Olsem wanpela lida bilong ol pipel, mi bai mekim olsem ol skul mas kisim gutpela luksave," Mul i tok.

Dispela tupela haus slip em wanpela man asples Lucas Palme wantaim ol wok boi bilong en i wokim.

Palme tu i lukim olsem ol sumatin i nidim tru dispela ol haus slip na em i wokim insait long 3-pela mun tasol. Ol i kisim diwai long bus na painim kappa, nil na simen long ol stoa bilong taun.

Long wankain taim, em i givim Millep Praimeri Skul K15, 000. Dispela mani em bilong wokim laibreri bilong skul. Em i baim sampela buk bilong ol sumatin tasol ino gat gut-



Mul (lephan) na Euga, em ol i apim na karim ol long rot i go insait long painim Millep Luteran Hai Skul.

Ol Poto: Bustin Anzu



Wagambie i tokim Mul long stretim ol haus bilong ol polisman na mi bai salim sampela i kam.



Mul i wokabaut namel long ol lain i samsam.

pela hap bilong putim. Olsem na taim em i go long opim dispela tupela haus slip, ol i askim Mul na em i givim i go bilong wokim laibreri.

Long wankain taim, em i tok em bai givim K400, 000 igo long Jiwaka polis. K100, 000 bilong baim kar na ol narapela em bilong stretim haus slip bilong ol polis long Banz na Nondugl.

Wantaim ol mani bilong ilektoret na DSIP o Distrik Sevis Impruvmen Program Fan, em i baim ol kar, stretim wara saplai, baim buk na kompyuta long ol skul i stap long

en.

Mul, wanpela lida husat i save bilip long Human Risos i tok ilektoret bilong em wanpela tasol insait long Jiwaka we i gat planti ol skul na em i putim mani bilong em igo insait long wokim nupela ol klasrum, haus slip na narapela ol infrastraksa sevis insait long ol skul

Em i bin tokim ol man meri bilong Jiwaka olsem long Not Waghi i gat 3-pela sekenderi skul olsem Global, Waghi Valley na Fr Peter (olpela Fatima Sekenderi).

Ol narapela olsem Kristen Lidas

Trening Koles o CLTC (Christian Leaders Training College), Fatima Vokesenel, Fatima Semineri, Hailans Luteran Koles (Highlands Lutheran College) na Millep Lutheran High School.

Ol narapela skul we i stap long tingting bilong memba em Nondugl Sekenderi, we em i putim K2.6m na Dalnamb Sekenderi em narapela skul we bai kamap.

Em i tok ilektoret bilong em i go pas long narapela tupela ilektoret bilong Jiwaka na askim tupela wanwok MP Jamie Maxtone Graham bilong Saut Waghi na Wake Goi bilong Jimi wantaim Jiwaka Transisenel Atoriti (JTA) long helpim long wok bilong edukesen.

Tupela lidaman bilong Jiwaka ino gat planti skul olsem em na planti bilong ol sumatin bilong tupela ilektoret i save go skul long ol skul long ilektoret bilong em.

Saut Waghi i gat Minj Sekenderi, Anglimb Hai Skul na Nazaren Melanesian Patoral Koles, klostu long Wara Tuman na Kudjip Skul bilong Nesing (Nazarene School of Nursing) taim Jimi i gat Kol Hai Skul.

Em i askim sapos Jiwaka tru tru tingting long kamap olsem wanpela provins bilong em yet, olgeta MP na gavman bilong JTA mas wok bung wantaim.

"Mipela noken westim nating toktok na westim ol mani long baim ol kain stail kar bilong mipela yet na stap hait. Mipela mas kam aut na tingting long ol yangpela bilong mipela long bihain taim," Mul, husat namba wan taim Memba bilong Pala-

men. Em i tok ol manmeri husat i kisim save bai mekim gutpela wok bilong Komyuniti na sapotim ol wok na tingting bilong gavman wantaim ol polisi na program bilong ol.

Em i askim ol lain husait i slip raunim Millep Luteran Hai Skul long lukautim dispela skul wantaim ol propeti na noken bagarapim na stilim long wanem, kain gavman sevis em bai hat long kisim.

"Yupela ol lain i slip klostu long skul na ol sumatin mas lukautim wanem samting i stap insait long

skul. Long dispela rot, em bai yupela i ken kisim planti helpim. Taim i gat planti ol gutpela saveman na meri, planti wok developmen i ken kam," em i tokim ol manmeri, sumatin na pipol bilong Jiwaka, husait i go bilong witnesim dispela tupela haus slip.

Planti bilong ol sumatin i amamas na kra, long wanem, nau bai ol i slip gut na skul.

Ol i amamas na karim Mul taim em i laik opim tupela haus slip na taim ol igo insait long tupela haus slip, ol i kalap na bikmaus, pasin kastom olsem ol i amamas long nupela presen bilong ol.

Benjamin Mul, husait em wanpela tisa, em i save i gat bikpela bilip long human risos olsem wei bilong soim rot igo pas. Long dispela as tasol na em i wokim bikpela invemen long skul we ol sumatin i ken kisim gutpela save.

Em i stap wantaim tingting bilong kamapim gutpela developmen long ol manmeri na tu, em i helpim planti ol manmeri long kisim gutpela save na kamapim gutpela sindaun insait long ples.

Jiwaka, wanpela bilong tupela nupela provins i mas bung wantaim long lukim planti ol senis insait long provins.

Jiwaka i gat samting olsem 200, 000 manmeri na 50 pesen bilong dispela, em ol yangpela manmeri, husat bai go pas long kirapim na developim Jiwaka (Jimi, Waghi na Kambia) na wok bilong kirapim ples i kamap pinis.

Jiwaka, ino olsem Hela we i gat gol, gas na oil tasol ol i ken bilip long Agrikalsa na ol pipol bilong ol.

Sapos ol i kamapim gutpela skul, planti bai kam bek na wok long gavman o kampani na kirapim Jiwaka o ol bai wok long narapela hap tasol karim mani kam bek long provins bilong ol. Na dispela bai strongim na kirapim ikonomi bilong Jiwaka.

Investim mani long edukesen bilong ol pikinini bilong Not Waghi em ino asua na Mul i go pas long dispela.

Taim ol invaitet ges olsem Euga, Kumi, ol polisman na niuslain i lusim Millep Luteran Hai Skul, ol pikinini i muvum ol samting bilong ol i go insait long tupela haus slip.

"Mi bai gat gutpela malolo na slip long gutpela haus slip. Mi bai givim rum met bilong mi long wokim gutpela stadi na malolo long pinisim ol skul wok bilong em," wanpela boi sumatin i tok long ol save pas pas na slip long ol olpela haus slip.

Narapela i mekim wankain nek olsem: "Ye, yu ken slip long dispela. Mi bai wetim narapela haus slip," em i toktok long narapela haus slip we Mul i tok long putim K100, 000 we ol bai wokim klostu taim.

Dispela i soim olsem kaikai na kisim save i no wanpela hevi. Tasol ples bilong slip tasol em i wanpela hevi olsem na Memba bilong Palamen bilong Not Waghi i no rong long go pas long luksave long ol skul na wok bilong edukesen.

Taim mipela kamap long Waghi Bris, mi lukluk i go bek olsem long maunten Kunumb na laik lukim sampela moa blekpela klaut tasol mi ino inap long lukim long wanem, mi lusim Millep na go long we tru.

Nogat, ples i laik dak na pilim sampela kol win bilong Wara Waghi i wok long kamap antap long blupela trausis bilong mi na mi ronowe.

# Raun wantaim Kanage olgeta wik



## Kros long beltait

WANPELA moning, papa Kanage go wok long gaden. Em wok i go na hangere kisim em. Em kam bek long haus na meri bilong em skelim kaikai bilong em. Kanage kaikai pinis na em tokim meri na pikinini meri bilong em, "yu tupela i go na karim ol pa-iawut mi brukim pinis na i stap long gaden". Pikinini meri bilong em les. Papa Kanage belhat na em tokim em, "Yu les long wanem! Bai yu stap tasol olsem! Bihain yu marit, man bilong yu bai mekimsave long yu long dispela kain pasin". Mama harim Kanage hatim pikinini meri na em tokim Kanage, "Inap ya! Maski long kros". Papa Kanage tanim em tokim mama, "Mi gat rait long kros na skulim em long wok. Yu noken tokim mi long pasim maus. Yu tupela les long mi kros, orait, yu tupela i go na painim



rot long kaikai na kisim mani!"

P Posou Manus

## Rais i no kuk yet...

KANAGE i stap wantaim meri bilong em longpela taim nau. Wanpela apinun, meri bilong Kanage i redim pot kaikai na putim long paia. Meri hariap i go waswas bikos em ples i hot. Em tokim Kanage long was long pot kaikai long paia. Em i go waswas na em lus tingting long kisim sop. Em i go bek long haus long kisim sop. Em i go antap long kisim sop na lek bi-

Soulist Raiiotzs Madang

## Ol skwat!

Salim ol gutpela Kanage

tok pilai i kam long:

Kanage Tok Pilai

P.O. Box 1982,

Boroko, NCD

Port Moresby.

Email: atolire@wantok.com.pg

# Sevis i no go long ol pipel long ples

*Dia Laiplain, MI WANPELA yangpela man i gat 30 krismas na mi bin pinisim Gret 12 long wanpela Nesenel Hai skul long kantri 5-pela yia i go pinis.*

*Mi no bin laik painim wok o skruim skul bilong mi i go moa yet, tasol mi bin go bek long ples long helpim famili bilong mi long wok long graun bilong mipela.*

Tru, ples bilong mi i stap long ruel eria longwe long taun, tasol mi amamas long mekim ol samting long ples na stap wantaim ol pipel bilong mi.

Wari mi gat long en em mi wok long harim planti toktok long daunim kraitim, HIV/AIDS na ol sevis i go long ples, na ol narapela i kam long gavman, ol NGO, ol sios na ol narapela stekholda. Long mekim dispela ol samitng, ol i save holim ol woksop ma konprens insait long ea kondisen hotel rum na risot olgeta yia.

Wari bilong mi em wanem taim bai ol ples i kisim ol sevis na tu, wanem taim ol bai holim ol kain konprens olsem long ples na pipel i ken go insait long ol?

Laiplain, i luk olsem planti mauswara tumas na nogat kaikai bilong ol na bai yumi mekim olsem long narapela 34 krismas i kam? Nau yet, ol pipel i les na ol i wok long go turangu tasol.

## CONCERNED YOUNG MAN

*Dia Concerned Young Man,*

Mipela i amamas olsem yu rait i kam long Laiplain long serim wari bilong yu wantaim mipela long ol samting i ken kamapim gutpela samting o hevi long laip na sindaun bilong pipel long dispela kantri. Mipela i luksave olsem yu makim maus bilong ol lain long ples na tu long taun na yu autim dispela wari. Mipela i amamas long yu i go bek long ples long stap wantaim ol pipel na bungim ol hevi wantaim ol long ples longwe.

Pren, mipela i sapotim yu long wok yu mekim long ples na bilong yu long skruim i go moa yet. Mipela i luksave olsem em i no isi long husat i pinisim Gret 12 long go bek long ples na painim samting long em i amamas long mekim. Yu no tokim mipela stret wanem samt-



ing yu mekim long ples, tasol i luk olsem yu amamas long samting yu mekim i stap.

Sapos yu stap amamas long ples, yu ting em i gutpela aidia long ol narapela skul liva i go bek long ples na helpim pipel bilong ol? Mipela i bilip em i taim nau long ol yangpela pipel long bihainim samting yu mekim long kamapim senis long ples.

Mipela i lukim daunim ol kraitim, HIV/AIDS na lukim olsem gutpela sevis i go long ples bai kamap sapos ol yangpela olsem yu i strongim tingting na i laik mekim ol samting bai wok gut long helpim pipel bilong yumi.

Mipela i ting olsem i moabeta sapos yu redi long ruel ples bilong yu na yu singaut long helpim, ol bai harim nek bilong yu long maunten i go long ol nambis ples na ol ailan. I moabeta yu askim ol gavman lain, ol stekhokda, ol NHO, na ol sios long kam na harim yu. Yu ken tokim ol tu long noken holim ol konprens na bung long ol motel, hotel na ol risot tasol raun i go long ol ples na toktok long pipel. Tokim ol long noken mauswara nating tasol putim mani long ol eria we ol i mas helpim long kamapim gutpela sevis na go toktok long ol pipel long ol ruel ples.

I gat tripela level bilong gavman i stap na em long 1- Nesenel, 2- Provinsel na 3-Lokol Level Gavman (Distrik) i mas kisim sevis i go long ples.

Yu kam stret aninit long kaunsela husat i makim pipel. Wok klostu wantaim em long kisim ol sevis i go long pipel. Nau gavman i wok long ples bilong 50 yia i kam bai wok long aninit level (bottoms up) i kam antap na yu ken serim ol aidia long wanem i gutpela long ol pipel na ol bai wok wantaim yu. Yu gat ol ilektet memba i gat ol EDF fan bilong pipel na ol i givim aut dispela manimak i go long ol provins long mekim ol wok. Painimaut moa long dis-

pela.

Pren, sapos ol i no kam long yu olsem, yu stretim wanpela delegesen o grup lon g lukim ol lain long atoriti long mekim samting. Laiplain i save olsem sampela Palamen memba i mekim samting long kisim sevis i go long pipel bilong ol i go olgeta lon g ol ruel eria. Sapos sampela i mekim samting i kamap, watpo na ol narapela i no inap? Ating i moabeta long rausim ol dispela memba i no wokim samting long helpim pipel, yu ting olsem wanem?

Pren, mipela i bilip olsem yu mekim raitpela samting na i moabeta long serim dispela wantaim ol narapela yangpela pipel i bin skul na i gat save olsem yu.

Mipela i lukim olsem sapos nogat man i mekim samting, ol samting i no inap wok gut. Mipela i nilip olsem ol dispela i stap long atoriti i no wokim samting stret bai kisim taim wanpela de. Ritim Bik bilong Amos, Saptu 5 ves 11 "Yu bagarapim ol turangu lain na stilim ol kaikai bilong ol. Olsem na bai yu no inap stap long gutpela haus yu bildim o dringim wain long niauswara wain gaden yu bin planim."

Wanpela samtingnem, makim ol gutpela lida long taim bilong ileksen. Planti lida i no save bisi long ol ples lain na em i hat long save watpo pipel i save givim vot long ol. Yumi pipel tu i mas kisim kibek (blame) long givim vot long ol rong lida. i moabeta yu karimaut awenes long eria bilong yu na pipel i kem givim vot long ol lida i gat stretpela pasin.

**Pren bilong yu- Laiplain**

**Sapos yu gat wari o hevi, rait i kam long dispela etres: Lifeline Counselling Services, P O box 6047, BOROKO, National Capital District, PNG. Yu ken ringim opis long telepon namba 3260011 o 3261680. O sapos yu stap long NCD, kam na lukim mipela long opis bilong mipela long Waigani. Mipela i no inap putim trupela nem bilong yu long niuspepa, tasol mipela bai putim ol wari na hevi bilong yu.**

**Laiplain**

**NEM:** Ludwig Hesai  
**KRISMAS:** 21 (man)  
**ADRES:** Kilipau village, P.O. Box 96, Vanimo, Sandaun Provins  
**SAVE LAIKIM:** Senisim Presen, pilai soka, harim musik na raitim pas.

**NEM:** Benjamin A. Wep  
**KRISMAS:** 20 (man)  
**ADRES:** Kilipau Village, P.O Box 96, Vanimo, Sandaun Provins  
**SAVE LAIKIM:** Pilai soka, voli bol, senisim presen na painim wanpela meri long maritim.

**NEM:** Patrick Gisiye  
**KRISMAS:** 20 (man)  
**ADRES:** New Century Wholesale, P.O.Box 218, Kiunga Western Provins  
**SAVE LAIKIM:** Pilai soka, mekim pren, raitim pas, go lotu na senisim presen.

**NEM:** Benuel Kapamai  
**KRISMAS:** 18 (man)  
**ADRES:** P.O. Box 2901, Lae  
**SAVE LAIKIM:** Pilai soka, volibol, pilai gita, harim musik, ritim buk na go lotu

**NEM:** Bairy Wou  
**KRISMAS:** 20 (man)  
**ADRES:** Kilipau Village, PO Box 96, Vanimo Sandaun Provins  
**SAVE LAIKIM:** Raitim pas, senisim presen, pilai soka, volibol na painim wanpela meri long maritim.

**NEM:** Benny Wagu  
**KRISMAS:** 18 (man)  
**ADRES:** Kilipau Village, P.O.Box 96 Vanimo Sandaun Provins  
**SAVE LAIKIM:** Senisim presen, raitim pas, pilai soka, volibol na harim musik

**NEM:** Terence Mathew  
**KRISMAS:** 16 (man)  
**ADRES:** Ohu Primary School, PO Box 169, Madang511, Madang Provins  
**SAVE LAIKIM:** Go skul, harim musik, go Lotu, raitim pas na mekim pren

**NEM:** Tenny Paul  
**KRISMAS:** 19 (man)  
**ADRES:** Komabea Primary school, PO Box 220, Kerema, Gulf Provins  
**SAVE LAIKIM:** Pilai spot olsem volibol, soka na basketbol, harim musik, ritim niuspepa na wok

**NEM:** Jamie Awe  
**KRISMAS:** 29 (man)  
**ADRES:** C/Hargy Oil Palms, PO Box 21 Bialla, West New Britain Provins  
**SAVE LAIKIM:** Lukim rugbi, mekim poroman wantaim ol arapela na painim wanpela lotu meri bilong maritim

**NEM:** Atasing Bafike  
**KRISMAS:** 27 (man)  
**ADRES:** Bumbum Primary School, PO Box 4588, Morobe Provins  
**SAVE LAIKIM:** Harim musik, pilai soka, watsim TV na pilai kompyuta gem



TORO



BIABIA



KANAGE



TOKWIN

Sir Rabbie malolo nau...

Sir Rabbie Namaliu, bipo Prais Ministri i Lusim opis bilong olsem Sansela bilong Yunivesiti bilong Netsorol Risoses na Enviromen(Bipo Vudal Yunivesiti) na go malolo. Dispela soim tru olsem bikman yah laik malolo nau na lusim pablik wok bihain long 40-pela yia olgeta olsem pablik sevan na politisen man. Planti taim em stap long palamen haus, kamap praim minsita bilong yumi na kamap spika tu bilong pala-

men haus. Em i givim planti sevis i go long kantri na nau em i laik malolo. Gutwan Sir Rabbie. Ating em i gutpela piksa yu soim long arapela we ol i tu i ken malolo na givim sans long ol nupela blut long ranim kantri.

Kiunga hot ples...

Trutru, Kiunga em ples bilong amamas gutpela ples bilong stap, tasol bikpela samting em hot bilong em, yu man o meri husat skin bilong yu save nogut long hot, bai yu kisim taim long Kiunga. Sapos i gat ais save pundaun long Kiunga, dispela liklik taun

bai pulap long kainkain manmeri bilong Papua Niugini.

Noken wari...

Tokwin i kam olsem dispela niu kliia o gas i pairap long Japan i ken bagarapim yumi, sapos ren i pundaun na yumi waswas long en. Tasol dispela tokwin i no tru, toktok i kam long nesinel disasta tok ol manmeri noken kisim poret tingting na stap long wei long ren. Noken poret na wari tok kliia bai kam.

Tokwin Tasol...

Table with 10 rows and 20 columns of letters, likely a word search or crossword grid.

Painim ol dispela provins bilong yumi:

- MANUS IS NU BRITEN BOGENVIL MELEN BE WESTEN IS SEPIK MADANG SIMBU SENTRAL ISTEN HAILANS NU AILAN WES NU BRITEN MOROBE NCD ORO SANDAUN ENGA GALP WESTEN HAILANS SAUTEN HAILANS

Grid for a 10x10 Ansa bilong las wik Sudoku puzzle.

Grid for a 10x10 Ansa bilong las wik Sudoku puzzle.

Ansa bilong las wik Sudoku

Grid for a crossword puzzle titled 'Ansa bilong las wik Pasol'.

Ansa bilong las wik Pasol

EMTV Television Guide

Table with columns for time, channel, and program name. Includes sections for 'HOT SEAT', 'BROADCAST', 'TRINDE, MAS 23 2010', 'MANDE, MAS 21 2010', and 'TUNDE, MAS 22 2010'.

Oi Program na Taim i ken senis...

# Bung bilong kamapim gen PNG Bisnis Kaunsil

**WANPELA tingting bilong kibung bilong ol bisnis manmeri long kantri em long strongim gen PNG Bisnis Kaunsil.**

Dispela bung em i bilong grup ol i kolim Indijenus Bisnis Samit (kibung) na Tred Ekspo na bai kamap long Kokopo, Is Nu Briten long narapela mun.

Menesing Dairekta bilong Nesenel Developmen Benk, Richard Maru i laik kamapim gen dispela kaunsil long strongim wok bisnis long kantri.

Maru i tok: "Dispela grup bai gat planti memba.

"Wantaim kamap bilong kaunsil, mipela bai kamapim tu Mama Lo na ol memba bilong bod bilong kaunsil long lukautim.

Wantaim dispela em i tok ol i laik kamapim tu Foren Investa Bod tu.

"Em i open maket polisi we mipela i makim long em, bikos kain pasin i wok long surukim manmeri bilong mipela i go long sait yet.

Em i tok inap long nau 10 pesen tasol bilong ol bisnis long kantri i bilong ol manmeri long Papua Niugini stret na ol arapela i bilong ol manmeri long narapela kantri.

"Mipela i mas kamapim sampela samting long kibung long Kokopo, bikos long 2014 ikononi bilong mipela bai groa tripela taim moa long mak em i stap long em nau.

"Husat bai kisim bikpela kaikai long dispela projek. Ol bisnis na planti bilong ol bisnis bilong ol manmeri long narapela kantri.

"Taim kain mak i stap dispela i min, planti mani bai go aut," Mista Maru i tok.

Em i tok Nesenel Developmen Benk bai helpim long givim mani long husat manmeri i laik mekim wok bisnis.

"Taim bilong sindaun na lukluk i pinis na nau i taim mipela i mas kirap na mekim sampela wok.

Em i tok kamap bilong kaunsil i bilong makim ol liklik manmeri bilong dispela kantri.

Polis Asosiesen bilong

PNG sekretari jeneral Clemence Kanau na presiden bilong Koraksinel Sevises Emplois Asosiesen Damien Ayebaibai i tok ol bai sapotim dispela tingting long wanem ol bai laik givim sans long ol opisa bilong ol husat i lapun pinis long givim nupela tingting long kamapim arapela wok.

Nesenel vais presiden Martin Kenehe, PNG Eneji Woka Asosiesen jeneral sekretari Sentee Margis, Nesenel Faia Asosiesen presiden Gabriel Paulus, Neses Asosiesen presiden Amy Kaptigau, Papindo Grup ov Kampani riteil menesa Eunice Isom na Amalgamed Jeneral Woka Yunion Helen Are.

Ol i gat pinis 750 deliget manmeri husat i baim pinis fi bilong ol na ol i stap long olgeta hap bilong PNG wantaim laik i kam long Vanuatu na Kwinslen Bisnis.

Long sapotim grup Nambawan Supa i baim pinis K100,000 na i kisim gol namba.



SAPOT: Nambawan Supa i givim K100,000 long kamapim Indijenus bisnis kaunsil

## Nambawan Supa makim Ellingson olsem independen dairekta

BIKPELA supa fan long kantri, Nambawan Supa Limited (NSL) i makim Marianna Ellingson olsem independen dairekta long bod bilong em.

Dispela ples i stap nating bihain long Ledi Aivu Tauvasa i lusim long las yia.

Mis Ellingson long dispela taim i Dairekta-Jeneral long Opis bilong Turisim, Art na Kalsa (OTAC) we i stap long Mosbi.

Em i gat Beksela ov Arts Digri long Politikol Saiens na Sosioloji long Yunivesiti bilong Papua Niugini, Masta ov Arts long Intanesenel Afeas (Developmen Stadi) we Ohio Yunivesiti long Amerika i givim em na i gat Pos-Greduet Setifiket



REDI: Ellingson husat i nupela NSL bod dairekta.

long Strategik Menesmen we em i kisim long Yunivesiti bilong Bristol long Inglan.

Long taim bilong tokaut long makim bilong em siaman bilong NSL bod Se Nagora Bogan i tok: "Mipela i amamas na welkamim dispela meri

husat i gat inap save long kam long bod.

"Wantaim save em i gat, em i kam wantaim save long pablik sekta long lokol komyuniti na tu mekim wok long Komenwel Sekretariat Opis long London, Inglan.

"Save bilong em i go wantaim long nupela wok em bai mekim olsem independen dairekta, strateji developmen na stratejik plening, mentoring, nigosiesen na konflik resolusen.

"Nupela wok bilong Mis Ellingson wantaim OTAC i givim em luksave bilong em i ken save gut long kalsa bilong PNG. Na dispela i gutpela tu long wok bilong promotim turisim na bringim mani i kam insait.

# PULAPIM TRU TRAK

## EM I NO WANPELA

# GEM

## NOKEN PULAPIM MOA LAIN LONG PMV

## RIDIM OL LIMIT SAIN

Ol PMV we i pulap winim mak o limit em wanpela long bikpela samting we i save kamapim dai long PNG olgeta yia. Sapos yu wanpela draiva o pasindia na save olsem PMV i pulap tru na winim mak stret yu putim birua long laip bilong yu na arapela pasindia. Em taim nau long tingting strong long ROT SEFT – em i no wanpela PILAI



OR





**KISIM:** Cullangan i givim bilum long Misis Elizabeth Gumbaketi, Eksekutiv Menesa long Strateji Polisi divisen bilong Helt Dipatmen. *Poto: ENIO KUBLE (Helt Dipatmen midia)*

# Wok bilong bilum long Hailans

PLANTI taim long Hailans, pasin bilong givim bilum o string beg long meri i min em i taim bilong wok. Em i min i gat ol wok meri i mas o bai mekim. Na dispela i save kamap long taim bilong baim meri. Ol lain bilong meri wantaim mani, kaikai na pik na ol arapela samting i givim long meri, lain bilong meri tu i givim em bilum na karim i go long haus bilong man. Dispela em long soim meri olsem em i no moa fri tasol i gat ol wok we em i mas mekim. Wantaim bilum dispela bai mekim isi long em. Dispela i no narakain taim

Provinsel Edministreta biong Westen Hailans, Malcolm Cullangan i givim bilum long Misis Elizabeth Gumbaketi, Eksekutiv Menesa long Strateji Polisi divisen bilong Helt Dipatmen i go mekim wok raun long witnesim kamap bilong nupela helt bod long provins long las wik. Gumbaketi long em i kisim bilum i min i gat wok em i mas mekim. Taim helt bod i kamap dispela i min tu olsem bod bai mas kisim helpim long Helt Dipatmen long mekim wok na Gumbaketi i stap long opis we bai givim helpim isi.



**GUTPELA SOLWARA:** Basamuk Be we faktori bilong MCC i stap. *FAIL POTO*

# Lokol manmeri i no painim pis long solwara

LONG las tupela wik, ol manmeri long Minde, Kulilau na Gungalau ples long Basamuk Be, Madang provins i no moa go raun long solwara long waswas o painim pis.

Dispela i kamap bihain long nius olsem i gat marasin nogut bilong wok long main we Saina Metalujikal Konstraksen Korporesen (MCC) o Ramu Nico i abrus na i kapsait long solwara.

Ol i lukim tu olsem sampela rip we i bin stap gut nau i tanim i go wait.

Na bihainim dispela ol toktok, askim i go long Provinsel Helt Atoriti long go sekim solwara na painim aut sapos

solwara i stap orait o nogat.

Tasol inap long nau nogat ol opisa i go long sekim hap bilong ol.

Wantok Niuspepa i laik kisim tok long MCC o long Madang Provinsel Helt Atoriti tasol i no bin inap long taim em i go long prin.

Mausman bilong ol manmeri Terry Kunning bilong Mindre ples i tok taim ol i go long opis bilong MCC long painim aut moa long kapsait bilong marasin, opis bilong ol i tok ol manmeri i no ken pret.

MCC opis i tok tu (2) lita bilong sal-farik esid tasol i kapsait long solwara.

Na tanim bilong rip i go long wait i pasin bilong rip tasol long laip bilong em.

“Tasol maski long dispela ol toktok, gavman i no laik kam mekim wok painim?”

“O em i wet inap long ol manmeri i kisim bagarap long laip bilong ol baim em i mekim samting.

“Planti bilong mipela i save stap strong long solwara na MCC i no ken giamanim mipela na gavman i no ken lusim tingting long kam helpim.

“Mipela i laikim helpim nau,” wari Kunning i tok.



**OPIM TINGTING:** Plawa i gutpela samting long wanem em i save mekim tingting bilong man i amamas. *Poto: ENIO KUBLE (DoH midia)*

# Job save bilasim gut ples

KALA bilong ol plawa tasol i save pulim ai bilong ol manmeri long laikim plawa.

Tasol i no long dispela wok tasol, taim ai bilong manmeri i go long plawa, tingting bilong ol tu i stap long kain kala plawa i gat.

Na taim dispela i kamap, tingting bilong manmeri tu i skelim tu olsem klos bilong ol i mas gat dispela kala o ol i mas painim klos i gat dispela klala na putim.

Moa yet long histori, planti manmeri bilong dro o raitim singsing i save tingting long plawa na kala ol i gat taim ol i mekim wok.

Dispela i wankain taim Monica Job bilong Mt.

Hagen, Westen Hailans i mekim gaden plawa baksait long haus bilong em.

Haus bilong Misis Job i stap klostu long Kagamuga Eiapot Risot na olsem em i no hat long em i kisim ol plawa na salim i go long hotel.

Motel i save baim Job K200 long ol plawa bilong em.

Taim em i mekim olsem em i mekim motel i luk gutpela na we ol plawa i nupela i mekim ol rum bilong motel i gat naispela smel.

Tasol dispela prais i ken senis long wanwan ol kastoma husat em i salim plawa long em.



**LAIKIM:** Ol prut long Mt.Hagen maket. *Poto: ENIO KUBLE (DoH midia)*

# Prut na kumu bilong Hailans

OL prut na kumu bilong Hailans i gat nem long gutpela bilong ol.

Moa yet prais bilong ol i daunbilo taim wanpela i laikim baim long ol maket long kantri.

Hagen maket long Westen Hailans provins i save gat kain kain ol prut na kumu we i gutpela long baim. Bikos long dispela manmeri olsem Jonathan Tuka bilong Mosbi (smaill insait long poto) i no inap long pasim tingting long baim dispela ol mandarin prut we prais bilong ol i stap long 20 i go long 50 toea. Mista Tuka i kisim tripela yangpela man long helpim em long karim ol bek prut na kumu em i baim.


Planti manmeri long ausait, moa long nambis, i save kisim inap mani long raun wantaim taim ol i go long Hailans. Dispela long wanem ol i bai baim planti ol prut, kumu, banana na kaukau.





**SOIM SAPOT:** CEO bilong BSP benk, Ian B. Clyne i sanap wantaim Ryan Pini long soim sapot bilong em na BSP i go long PNG Swimming taim benk i givim ol K80, 000 sponsa manila las wik Fraide long Mosbi. *POTO: ANDREW MOLEN.*

**KISIM:** Gol Atek pilaia bilong Brian Bell i rausim bal i go long ol wanpilai bilong em taim ol i bungim Datec long netbol resis bilong ol Praivet Kampani long Sande las wik long Rita Flynn kot long Mosbi. *POTO: Andrew Molen,*



**KALAP:** Pilaia bilong Australian Bolters (antap) i resis wantaim PNG Mosquitos pilaia long kisim bal long intansenel gem bilong ol long Mosbi las wik Sarere. *POTO: ANDREW MOLEN.*




**GOL:** Wanpela ampaia bilong AFL i apim plak long soim olsem gol i kamap insait long AFL gem namel long PNG na Australia long Mosbi las wik Sarere. *POTO: Andrew Molen.*




**MAKIM:** Wanpela Coasters pilaia i makim gut wicket bipo em i tromol bal i go long birua bilong em long Mosbi kriket resis las wik Sarere long Colts pilaia graun long Mosbi. *POTO: Andrew Molen/ Wantok.*

**TOKSAVE:** Salim ol spots dro bilong yu kam long Feks; 325 2579, e-mel; [amolen@wantok.com.pg](mailto:amolen@wantok.com.pg) o kam lusim long Wantok Niuspepa opis long Central Waigani, NCD.



# Stail bilong pilai tenis



**WANPELA** bikpela luksave bilong gem, tenis, em ol siot na kolos bilong ol pilaia bilong dispela gem.

Oi i save luk nais na klin tru wantaim ol stail klos olsem siot, trasis, sun a soks bilong ol we ol i save putim na pilai.

Tasol stail bilong tenis i no pinis long ol klos na bilas bilong ol.

Gem i gat stail long pilai bilong en na tu long ol arapela wok redi, trening na ogenaisesen bilong en.

### Histri bilong gem

I nogat tok klia tru long wanem taim tenis i stat o long husat tru i kamapim bilong wanem i gat planti stori bilong dispela.

Tasol i gat wanpela as tru bilong gem we olgeta i bilip long en, olsem tenis i kam long wanpela long gem ol i kolim 'jeu de paume' long tokples Frens (French) namel long ol yia long 1100's.

Dispela em i gem olsem tenis tasol ol i save paitim bal wantaim han bilong ol na i no wantaim reket (racquet) olsem long nau.

Bihain, ol i kamapim han glav long pilaim dispela gem.

Plantil ol arapela tenis gem i kamap long 'jeu de paume' we ol i givim wanwan nem bilong ol long wanwan kantri.

Sampela i kolim "real tennis", "court tennis" na "royal tennis" long Gret Briten, Amerika na Australia.

Harry Gem na Augurio Perera em tupelo man husat i go pas long bungim ol loan a stail bilong dispela olgeta gem namel long 1859 na 1865 long kamapim tenis gem we yumi save tete.

Oi i bungim tupelo gem "racquets" na "pelota" we i narapela nem bilong dispela ol gem we i wok long kamap.

**YUNIFOM:** Oi klos na bilas bilong ol tenis pilaia.



Dispela ol gem i bin kamap olsem "lawn racquets" na "lawn pelota" na bihain ol i senis i kamap olsem "lawn tennis" olsem yumi save tete.

Nem "tennis" i kam long frens tokples "tenez" we i min olsem "kisim", tendere (holim) o "tenir" (holim dispela).

I gat bilip olsem Arab tokples "rahat" we i min "han", em i kamapim nem "racquet", samting we ol pilaia i save yusim long paitim bal insait long tenis gem.

### Stail na loa bilong pilai

Tenis gem i save kamap antap long wanpela kot.

Oi i save taitim net namel long kot olsem long volibol tasol long tenis, dispela net i save stap daunblo, long mak bilong bel bilong man i go daun long graun.

I save gat gem we tupela pilaia i salensim narapela tupela ol i kolim, dabol (doubles) na gem bilong wanwan pilaia ol i kolim singol (singles).

Astingting bilong pilai em long paitim tenis bal i go antap long net na i go hapsait long kot we narapela pilaia bai traim long paitim i kam bek wantaim reket.

Pilaia bai kisim poin taim em i paitim bal i go hapsait long net na narapela pilaia long hap i no pasim dispela bal.

Poin bai go long pilaia husat i paitim dispela bal i go abrusim narapela.

Yu bai kisim poin tu sapos narapela pilaia

i paitim bal i kam pas long net o sapos em i paitim bal i go autsait o i mekim wanpela asua.

Oi i save pilai insait long ol set olsem long volibol na pilaia husat i winim planti set bai winim gem.

Oi meri save pilai tripela set na ol man i save pilai 5-pela set.

Dispela ol naispela klos na bilas ol tenis pilaia i save werim na pilai em i no klos nating, dispela em i olsem yunifom bilong ol.

Wanwan spot i save gat ol bilas na klos bilong ol na dispela em i wankain long tenis.

Tasol dispela ol klos bilong tenis em i malumalu na ol i mekim long kain ol laplap we bai no inap mekim skin bilong ol i hat tumas taim ol i pilai insait long san.

Su bilong ol em i kain we i no inap wel long kot na ol hap laplap ol i save pasim long han na het em bilong rausim tuhat.

Yu bai tuhat nating long pilai dispela gem bilong wanem yu bai ron i go kam long sait bilong yu long kot long traim na paitim bal we yu no save narapela pilaia bai paitim i go long en.

Wanwan pilaia mas i gat reket bilong em we i gat wankain wok olsem bet bilong kriket na sofbol we yu bai yusim long paitim bal.

Tenis reket i gat stail bilong em yet na hevi bilong wanwan inap laik bilong wanwan pilaia.

Yu bai yusim dispela reket long paitim tenis bal.

### Tenis long PNG

Tenis i no bikpela spots tumas long PNG tasol em i stap na planti manmeri husat i save pilaim em ol sumatin bilong ol intanesenel skul na wokmanmeri bilong narapela kantri husat i stap na wok long PNG.

Nau yet em i stap long ol bikpela ples olsem Mosbi, Lae na Madang tasol em i gat sans long go aut long planti moa ples bilong ol arapela manmeri long stap insait long en.

Wantaim sapot bilong BSP, Tenis Asosiesen bilong PNG bin inap long kisim ol trening na skul bilong tenis i go long olgeta provins insait long kantri.

Long 2009, ol i go long ol ailan na nambis ples na long 2010, ol i go long ol ples insait olsem long Hailans.

Oi i kisim dispela ol trening i go long ol skul we ol tisa na sumatin i go pas long lainim.

Kain wok bai helpim tenis i gro insait long PNG.

### Sampela biknem pilaia

Long ol arapela kantri, tenis em i wanpela bikpela spot na i save gat ol bikpela tonamen bilong en i kamap olgeta hap long wol.

Sampela bilong ol biknem pilaia bilong dispela gem em; Roger Federer, Pete Sampras, Andre Agassi, Lleyton Hewitt na Michael Chang bilong ol man na ol meri em Venus na Serena Williams, Jenifer Capriati, Maria Sharapova na Steffi Graf.

Tenis em i wanpela spot we i save hat tu long kamapim na lukautim bilong wanem em i mas i gat gutpela ples bilong pilai we i mas inapim mak bilong intanesel level.

Long wankain taim, ol samting bilong en pilai olsem bal na ol reket em i bikpela mani.

Tasol wantaim gutpela sapot bilong gavman ol sponsa na tu ol manmeri, tenis i ken groa i kamap olsem wanpela spot we planti moa manmeri ken save long en.

# Kik op bilong NRL Draiva resis

EM i wanpela gutpela samting tru we las de bilong rejistresen bilong MVIL NRL PMV Draiva Resis las wik Fraide i bin kamap long wankain taim olsem kik op bilong NRL ragbi lig kompetisen.

Lokol pilai namel long South Sydney na Sydney Roosters, wantaim narapela Kwinslen gem namel long North Queensland na Brisbane Broncos em tupela bikpela gem bilong opim 2011 sisen.

OI PMV draiva bilong PNG i lukim ol yet olsem ol i go insait long resis bilong ol na ol i strong long dispela.

Sapos ol dispela draiva i mas go het long win long Gren Fainol bilong resis, bai ol i kalap long balus i go long stap insait long NRL Gren Fainol long mun Oktoba. Ol bai mas soim klia wankain pasin olsem ol hiro bilong ol bai pilai long NRL gren fainol.

Strongpela bilip em i wok i stap nau. Luksave long ol rul we ol i mas bihainim. Na disiplin o pasin bilong bihainim stret pilai na givim strongpela gem. Sapos yu senisim futbol fil wantaim ol rot bilong yumi long kantri, i ken senis.

Dispela salens i stap wantaim ol PMV draiva bilong yumi em i wanpela bikpela salens i ron faivpela mun.

Olgeta taim wanpela long ol dispela draiva i no bihainim ol loa bilong MVIL long dispela resis, ol i no lusim nating tupela poin long pilai. Nogat. Em bai ol i lusim laip bilong ol pasindia bilong ol.

Mi save olsem ol rida, na moa yet ol PMB pasindia i save long loa bilong ol wasman bilong ron long bas bilong ol. Noken spid, dring spak na draiv, o ovalotim kar bilong yu. Sapos yu asua long ol dispela loa, inap long tupelo taim, bai yu go aut long resis na sans bilong winim prais.

Wankain olsem wok bilong refri i save kamap long fil, yu bai gat sans long tok strongim as long yu asua. Sapos draiva bilong yu i spit, i ovalotim kari o i spak, mi askim yu long tok 'NOGAT'!

Yu mas tokim ol wanlain bilong yu, olsem dispela kain pasin, i no stret. Yusim rait bilong yu na tokim draiva olsem em i asua pinis. Yu olsem pasindia, i gat bikpela wok long traime kamapim gutpela, seif ron long rot bilong yumi olgeta.

Ol namba i kam long MVIL i wanpela gutpela stia. Planti long yupela i klia long resis bilong mipela, na wanem ol loa i stiaim ol draiva.

Mi bai tokautim ol dispela namba long ol wik i kam, tasol ol i soim klia stretpela ron bilong dispela pilai.

Yusim maus bilong yu – nogut bai lokol bas draiva bilong yu i tok tenkyu long yu long stretim ron bilong em, bikos em bai winim resis long mun Ogas.



**BIKPELA SPONSA: OI ofisol bilong SAPNG, Globe na NN1 i sanap wantaim sek long Tunde dispela wik taim ol i tokaut long sponsasip long Mosbi. POTO: i kam long Globe.**

# Globe lukautim sefing taitols

GLOBE i wokbung wantaim NN1 long kamap olsem mama sponsa bilong nesenel sefing (surfing) taitols we bai kamap long Tupira long Madang long Mas 19 i go long 26, dispela yia.

Madang em i asples bilong Globe na

ol i tok dispela sponsasip em i gutpela rot bilong ol wantaim NN1 long strongim nem bilong ol insait long provins na tu helpim kamap na ron bilong sefing long hap na tu insait long kantri.

Surfing Association of PNG (SAPNG) i tokaut long sapot bilong Globe long Tunde las wik long Mosbi bihain long Globe na NN1 i putim K50, 000 long kamap mama sponsa bilong dispela tonamen.

## Tingting long kam bek strong

■ i kam long pes 28

Dispela hevi mekim tu na em i no bin pilai tumas long dispela yia tasol em i redi nau na i soim long trening na pri sisen dispela yia olsem em i redi long kam bek.

Manly kosa, Des Hassler i tok tu long ol nius ripot olsem ol i amamas long Stewart i orait na i kam bek long pilai tasol ol bai was gut long em tu long em i noken bagarapim dispela hap lek bilong em gen.

Long wankain taim, Melbourne i tok fulbek bilong ol, Billy Slater, bai pilai long dispela gem tu.

Slater i bin gat sampela hevi long sholda bilong em na i bin kisim operesen long of sisen.

I bin gat bilip olsem Slater bai no inap pilai long sampela gem long namba wan hap bilong sisen tasol Melbourne i putim nem bilong em long tim bilong dispela Sarere.

## Rogers pilai AFL long Mosbi

Andrew Molen i raitim



**PILAI: Rogers i pilai AFL wantaim ol PNG pilaia las wik Sarere long Mosbi. POTO: Andrew Molen.**

BIPO Australia Kangaroos na Wallabies pilaia, Matt Rogers i bin kam pilai long PNG las wik Sarere.

Tasol dispela bipo faiv eit na senta bilong Gold Coast Titans i no pilai ragbi lig, nogat, em i mekim save long Osi ruls (AFL) insait long wanpela gem namel long PNG Mosquitos na Australian Bolters.

Mosquitoes i win tasol Rogers i bin amamas long pilai wanpela gutpela salens agensim ol PNG pilaia husat i save long em olsem wanpela fevret pilaia bilong ol long NRL.

Rogers i kam wantaim sampela ol arapela bipo ALF pilaia bilong Australia long pilai dispela gem we i makim tu pinis bilong Australia wik long PNG.

Ol i kamapim tu sampela trening klinik wantaim ol yangpela pilaia long moning bipo long gem bilong ol i kamap long avinun long Amiri Park.

Bihain long gem, em i kamap long wanpela bung bilong AFL PNG we em i givim sampela toktok long strongim ol spotsmanmeri bilong PNG.

# Morris daunim sans bilong Orijin

BIHAIN long em i kamapim wanpela strongpela gem long Mande nait wantaim ol Bulldogs agensim Tigers, Josh Morris bai no inap pilai gen inap 6 o 8-pela wik.

Dispela bai daunim sans bilong em tu long pait long wanpela ples insait long NSW Blues sait bilong Stet ov Orijin dispela yia.

Morris i bagarapim raithan sait lek skru bilong em long Mande nait taim em i pun-daun krangki bipo tasol long trai bilong wanpilai bilong em, Kris Keating, long namba tu hap bilong gem.

Oi wokpain aut bilong dokta long Tunde dispela wik i soim olsem em i brukim sampela masol long dispela hap bilong lek bilong em.

Morris i soim gutpela mak long gem bilong em dispela yia taim em i brukim banis bilong ol Tigers na i ron 95 mita long putim trai, bipo long em i bungim hevi.

Oi ofisol bilong Bulldogs i tok Morris bai raun wantaim banis long lek bilong em inap tripela wik na narapela tripela wik bai em i kisim helpim long stretim na strongim lek bilong em long wokabout na ron gen.

Sapos ol samting i kamap gut em bai Morris i ron wantaim tim gen long raun 8 taim ol i bungim South Sydney.

Dispela bai lukim em i gat tupelo gem tasol long traim na winim wanpela Blues jesi.



**BAGARAP:** Sans bilong Morris long winim ples insait long Blues skwat i go daun.

## Campbell sanap stronga

OL i ting olsem Preston Campbell i liklik tumas na i noken pilai ragbi lig tasol nau em i kamap wanpela bikpela nem long gem bilong em.

Dispela Sarere bai Campbell i pilaim 250 fes gred gem bilong em taim em i ron i go insait long pilai graun wantaim Titans agensim Melbourne Storm long AAMI Park.

Em i kamap namba 5 man insait long gem dispela sisen husat i pilai moa gem long ol arapela.

Oi narapela 4-pela husat i pilai moa gem long em, em Darren Lockyer bilong Broncos (334), Nathan Hindmarsh bilong Eels (284), Petero Civoniceva bilong Panthers (268) na Bulldogs kepten, Andrew Ryan (268).

Campbell, 33 krismas i no stap insait long planti bikpela intanesenel gem tasol em i gat bikpela luksave long ol sapota bilong gem na tu long ol asples manmeri bilong em long Australia.

Em i go pas tu long kamapim dispela pri sisen All Stars NRL salens we i stat long 2010.

Longpela bilong Campbell em 167cm tasol em i no harim toktok bilong ol lain husat i ting em i liklik tumas long pilai, taim em i liklik yet.

Em i pilai 14 yia olgeta long nam-



**LUKSAVE:** Campbell bai pilaim 250 gem bilong em dispela Sarere.

bawan ragbi lig resis long wol na i winim wanpela NRL gren fainol pinis taim em i stap wantaim ol Panthers na las yia i makim ol manmeri bilong em taim em i pilai olsem kepten bilong Indigenous All Stars tim.

Kosa bilong Titans, John

Cartwright, i tok dispela em i bikpela samting bilong Campbell bilong wanem em i no bikpela sais man tasol em i strongpela man tru na nau bai pilai 250 bilong em long sinia level.

"Em i gutpela pilaia tasol em i gutpela man tu husat i save amamas tasol long wokbung na helpim klap long planti ol samting.

"Em i gutpela piksa bilong ol pilaia bilong mipela na tu bilong ol arapela manmeri husat i save pilaim dispela gem," Cartwright i tok.

Oi tim bilong dispela gem em; Storm: Billy Slater, Matt Duffie, Dane Nielsen, Beau Champion, Anthony Quinn, Gareth Widdop, Cooper Cronk, Adam Blair, Cameron Smith (c), Jaiman Lowe, Kevin Proctor, Sika Manu, Ryan Hinchcliffe. Intansenis: Todd Lowrie, Bryan Norrie, Troy Thompson, Jesse Bromwich.

Titans: William Zillman, Kevin Gordon, Steve Michaels, Clinton Toopi, David Mead, Luke Capewell, Scott Prince (c), Luke Bailey, Riley Brown, Matthew White, Greg Bird, Bodene Thompson, Ashley Harrison. Intansenis: Michael Henderson, Sam Tagataese, Ryan James, Preston Campbell, Mark Minichiello.

### RAUN 2 DRO

MAS 18-21, 2011

**Fraide, Mas 18**

**Eels V<sup>s</sup> Panthers**  
7:30pm - Parramatta Stadium

**Raiders V<sup>s</sup> Broncos**  
8:30pm - Canberra Stadium

**Sarare, Mas 19**

**Storm V<sup>s</sup> Titans**  
5:30pm - AAMI Park

**Tigers V<sup>s</sup> Warriors**  
7:30pm - Leichhardt Oval

**Cowboys V<sup>s</sup> Knights**  
8:30pm - Dairy Farmers

**Sande, Mas 20**

**Rabbitohs Vs Bulldogs**  
2pm - ANZ Stadium

**Roosters Vs Eagles**  
3pm - SFS

**Mande, Mas 21**

**Sharks Vs Dragons**  
7pm - Toyota Stadium



**TURBO Kredits blo yu!**

**Yu ken baim K10, K20 na K40 TURBO!**

Long save moa ringin Customer Care long 1551 or Emailim support@bemobile.com.pg

# K5

**Usim Kredit blo yu**

Presim\*1290\*1\*5# Send



# K25

**Call Value**

Long Extra Minets na SMS long bemobile, digicel & telikom



**bemobile** mipela bilong yu

**K5 TURBO valid for 14 days**  
Terms & Condition Apply

topup long olgeta direct topup  
or baim topkad long baim Turbo

• Yu mas gat Kredit balens long baim Turbo  
• Yu ino inap baim TURBO wantaim bonus Kredit  
• Yu ken ring na SMS wantaim TURBO insait long PNG tasol



## Ol wok redi bilong 2011 Distrik gems

LONG 2012 bai PNG gems i kamap long Kokopo long Is Nu Briten.

Dispela bai namba 5 PNG Gems, we i bin stat long 2003.

Long dispela taim inap nau, em i wok long i go bikpela isi isi.

Laspela PNG gems i bin kamap long NCD long 2009 we i lukim olgeta provins i kamap long soim ol stail, save na strong bilong ol long pilai.

NCD i soim gutpela wok tu long redim planti samting bilong helpim ol wok bilong gem i kamap na ron gut.

Ol i mekim gut tu long kamapim ol ples bilong pilai na bilong ol tim long stap long en tu.

Planti moa spots i bin kamap long NCD, dispela i moa long ol arapela gem bipo.

Nau yumi mas lukluk long 2012 PNG gems bai kamap olsem wanem?

Em bai wankain olsem NCD long 2009, em bai go moa long NCD o em bai aninit?

I gat planti samting tu we ENB na ol arapela provinsol tim tu mas i wok hat long stretim bipo ol i kamap long dispela ol gem.

Yumi bai wet tasol long lukim dispela gem bai kamap olsem wanem.

Orait, nau bai mi toktok gen long ol astingting tru bilong dispela.

As tru em olsem, ol provins i mas apim ol wok redi bilong ol bilong go long 2012 PNG Gems.

Olsem mi tok pinis planti taim long hia, gutpela wok redi mas i kamap long taim yet bilong go long dispela ol gem.

Bipo tasol long pinis bilong 2009 PNG gems, mi tok tok long ol wok redi mas i stat bihain tasol long olgeta manmeri go bek long ol asples bilong ol.

Taim mi bin toktok long dispela, mi min ol wok redi mas i stat long Jenuari, 2010 yet.

Olgeta plen na tingting i ken stat long Jenuari, 2010 wantaim ol samting we wanwan provins i laik mekim.

Long dispela taim, ol provins bai wok long apim ol wok na trening bilong ol na putim olsem samting is tap redi tasol.

Wanpela hevi bilong ol provins em wok bilong makim ol tim na etlit bilong makim ol.

Planti taim ol i no save gat inap taim long mekim dispela ol seleksen we i lukim planti manmeri na tim i no save inap long givim helpim bilong ol long en.

Gavman, ol kopret sponsa na wanwan manmeri tu mas i gat inap taim long sapotim tim tu.

Ol teknikal ofisol tu i no save gat inap taim long redim ol tim bilong ol, na putim ol i go insait long ol trening kem na ol arapela kompetisen.

Dispela ol wok i mas i gat inap taim na arapela risos long kamapim na ronim.

Long dispela as mi tok olsem i mas i gat taim bilong ol gavman na kopret sponsa long givim han.

Givim ol sans na inap taim long kam na helpim wantaim ol astingting na plen bilong ol tim.

Sapos yu no givim inap taim bilong dispela, em yu yet save pinis long wanem kain bekim yu bai kisim long ol.

Planti manmeri bilong ol ruel eria i stap long ol ruel eria, long dispela as yu mas tingting long kamapim na ronim gut ol distrik gem wantaim inap risos bilong en.

Tasol sapos yu nogat inap taim na ol risos o samting bilong mekim dispela ol progrem na tingting bilong yu i kamap em nau bai dispela tingting i no inap kamap.

Gutpela tingting na wok lukaut i mas kamap long plenim na i mas i gat ol wokmanmeri stap olgeta taim long lukim i kamap.

Ol ruel etlit em ol as tru bilong dispela gem long kamap.

Dispela ol gem bai nogat as bilong en sapos yumi no givim gutpela tingting na luksave long ol ruel manmeri bilong yumi.

PNG Sports Foundation (PNGSF) i kamap long helpim ol provins long ol kain rot olsem.

Yu ken toktok wantaim mipela long ol rijenel opis bilong mipela.

Sapos yu laikim helpim na sampela stia tingting, ringim mipela long dispela ol namba,

POM-325 1991, NGI- 982 5052, Momase- 472 1029 na NSI (Goroka)- 732 2391.

## Willie bai pait long Pasifik taitol laspela taim



**SALUT: Willie laik pinis wantaim bikpela wim. WANTOK POTO.**

Andrew Molen i raitim

NAMBA wan taim tru Jack Willie go insait long ring long makim Papua Niugini long boksing em long 1994 taim em i gat 15 krismas tasol.

Nau, Willie i gat 32 krismas, na i wok long redi long laspela Pasifik gems tonamen bilong em.

Em bai pait tu long winim bek dispela gol medol taitol bilong em we em i bin kisim long 2007 Pasifik Gems.

"Em bai laspela taim bilong mi na mi laik pinis long antap," Willie i tok.

Tasol bipo long Pasifik Gems, Willie bai go tromoi han long Arafura gems pastaim we em i lukluk tu long kisim wanpela gol medol i kam bek.

Wanpilai bilong Willie husat i kosa bilong NCD tim i go long Arafura gems, Mark Keto, i tok Willie i gat planti ekspiriens na save long gem

na tupela i save wokbung wantaim long trening na lukautim ol yangpela boksa.

"Sampela taim mi tu i save kisim helpim bilong em long trenim ol arapela boksa.

"Em i sinia paitman tu na ol planti ol yangpela na mi tu i save lukluk long em long pusim ol long trening strong na noken giv ap hariap," Keto i tok.

Willie i save pait long 48kg divisen (light fly), lait flai wet, hevi bilong divisen i go antap nau long 49kg na Willie i redi long ol salens we bai kam long ol arapela kantri.

"Trening bilong mi go orait tasol na mi pilim tu olsem strong na fitness bilong mi kam antap pinis long gutpela mak," em i tok.

Sampela i tok dispela bai laspela yia bilong Willie tasol em i tok em i gat tingting long pinisim wantaim 2012 olimpik gems long London.



**STAP YET: Olpela Kumul fowet na kepten bilong Muruks, Joseph Omae, bai go pas long ol gen dispela yia. POTO: Bustin Anzu.**

## Muruks i redi

Bustin Anzu i raitim

SBSL MENDI Muruks i gat bikpela tingting olsem dispela yia, ol bai kamap strong long winim gen dispela bikpela prais bilong ragbi lig long kantri.

Muruks, husat i winim tripela gren fainol, i tok ol i karim plak bilong Sauten Hailans na dispela em i wanpela bikpela samting ol mas i gat long tingting.

Sponsa, Tom Higgins, husat i sponsaim Muruks aninit long kampani nem bilong em, Structural Bridging Systems Limited (SBSL), i tok dispela yia em bai wanpela gutpela yia bilong ol.

"Mipela i gat bikpela tingting long pilai gut na winim dispela bikpela tropi bilong ragbi lig we nupela sponsa Digicel bai kamapim dispela yia.

"Mipela karim nem na plak bilong Sauten Hailans na mipela i pilai long planti ol gren fainol na kisim planti ol

gutpela prais na mipela i laik i go bek gen long dispela hap," Higgins i tok dispela wik.

Em i tok, long dispela as, ol i bin wokim planti senis insait long tim bilong, ol i rausim ol olupela pilaia na kisim planti ol yangpela we ol bai skruim tim i go moa yet.

Higgins i tok ol i no save tingting long kisim ol nem pilaia long narapela hap i kam insait tasol, ol i gat tingting long kamapim ol nupela pilaia, we planti no luksave long ol.

"Mipela i save laik long kamapim ol pilaia we ol i stap autsait na soim ol long we bilong pilai ragbi na kamap sampela trupela man insait long wol bilong ragbi lig.

"Dispela em wanpela bikpela tingting bilong mipela na plen mipela i save gat long en," em i tok.

Higgins i tok tu olsem ol i no baim ol pilaia long narapela hap tim tasol givim skul long ol yangpela husait i ken kamap sampela gutpela pilaia insait long klab na kantri tu.

Em i tok tu olsem long dispela yia, tupela narapela tim, Isapea bilong Galp provins na Huli Wigmen bilong Hela provins, tu bai kam insait long skelim strong bilong ol insait long dispela bikpela resis tu.

"Dispela tupela tim bai mekim dispela bikpela pilai resis i strong na swit moa yet.

"Tupela bai kam wantaim ol nupela stail bilong ol na mipela ol narapela tim i mas kisim was long en tu," em i tok.

Higgins, wanpela strongpela sapota bilong ragbi lig insait long kantri tok, long skelim ol nupela mangi bilong en, bai gat sampela ol trail pilai kamap namel long ol na arapela ol tim.

Em i amamas tu long tim menesmen bilong em long holim dispela tim i stap wantaim na winim primiasip long 2006, 2007 na 2008 na dispela tingting na swit bilong fainols i stap laip yet long ol na ol i laik go bek na lukim.

# Hekari pilai long kisim bek respek

Tingting long kam bek strong



Andrew Molen i raitim

**BRETT Stewart** bai pilai long NRL gen bihain long em i wet moa long wanpela yia long sait lain.

Laspela taim Stewart i pilai em long raun wan bilong 2010 sisen taim em i kisim bagarap long lek skru bilong em.

Dispela yia, em i bin pilai 20 minit long pri sisen agensim Warriors na klap i amamas long tokaut olsem em i fit na i redi long namba wan gem bilong em dispela Sarere agensim Melbourne.

Stewart, 26 krismas, bai kisim bek ples bilong em long fulbek gen insait long tim we winga, David Williams bai no inap pilai.

Williams i kisim bagarap long lek masol bilong em na bai no inap pilai tasol nem bilong William Hopoate i stap long

kisim ples bilong em long dispela gem. Stewart i kisim bikpela win tu taim ol i rausim ol sas bilong em long 2009 we ol i bin tok olsem em i bin bikhet long wanpela meri bihain tasol long lonsing bilong tim bilong em bipo tasol long ol gem i stat.

**Moa long Pes 25.**

TIM SPIRIT: Hekari bai strong yet.

**Muruks i redi long Digicel Kap Pes 27**

**Laspela Pasifik Gems Willie. Pes 27.**

**Globe lukautim sefing taitols long Madang. Pes 25**

## Johnston's Pharmacies



For First Aid Kits. Red8 Body Bulk Protein Supplements. Thompson Vitamins, Bandages, Strapping Tape, Mouth Guards.

**All Sport and First Aid requirements.**



P.O.Box 1066 Boroko.  
Phone 325 3185. Fax 325 0190.  
Email sales@johnstons.com.pg."